

秋碧吟廬詩鈔

丁亥

特別
イ4
3152
81



14
3152
81



訂正用



95-141



<p>盧詩鈔</p>	<p>佩瑤吟</p>
------------	------------

昭和丁卯晚春

澹如滑川達



詩人與史家術業不同而相似者存焉。司馬子長。生龍門。南度江淮。上會稽。浮沅湘。北涉汶泗。訪齊魯之都。過梁楚以歸。又西征巴蜀。南略邛笮。昆明。而其所著史記。彙括古今。評騭人物。俯仰低徊。感慨係焉。是史而詩也。杜子美。襄陽人。客吳越。游齊趙。困洛陽。長安。避亂秦州。流落劍南。往來梓夔間。出瞿塘。下江陵。臨洞庭。上衡山。而其間治亂興廢。悲懼憂樂。一託之於詩。是詩而史也。嗚呼。詩人之與史家。豈全異乎哉。久保君天隨。早歲卒業大學。專事鉛槧。中年仕宮府。任編修。平生以詩爲命。足跡殆遍海內。又及青邱赤縣。游必有詩。既刊甲籤。以

至丙籤每一籤出。聲價益騰。頃者將刊丁籤。求序於余。余受而觀之。中多遼瀋之作。才華流麗。音節高亮。使事用典。靡不如意。蓋非才學竝優。兼諳乙部。則不能也。顧余史家耳。固不知詩。然竊謂詩者述志。史者記事。記事主客觀。述志重主觀。重主觀則其弊也。虛而少實。主客觀則其弊也。質而不腴。二者雖異。其病一也。獨彼龍門之史近詩。少陵之詩類史。故其詩與史。千載之下。猶使讀者觀感興起焉。天隨既善詩。而兼通史。宜矣。其詩之與時流迥然異撰也。聞天隨既踰知命。壯心不已。海外名勝。未目睹者。行將遍歷窮討。則其詩境益變流麗者。

爲莊重。高亮者爲沈鬱。汪洋渾厚。以蓋一世。亦未可知也。余少小好游。五入禹域。山則望泰華。恆嵩。水則涉江。淮河。漢。近歲更游兩粵。觀其江山清秀。雲煙變幻。以爲天下絕景。竊恨古來稱此地爲瘴癘之鄉。往游者少矣。天隨他日一游。發其祕奇。以上之聲律。其音必有泱泱乎足驚人者。余老矣。所修之史未成。而今觀其丁籤將出。雖欲不忸怩。可得乎。乃序。時昭和元年十二月也。器堂市村瓚次郎撰。

余游日本數矣。詩人如禾原石埭、槐南、郵筒、往還、辱締
忘年之契。每思哀集曩昔所服膺者。爲苔岑集若干卷。
以代鑄金。顧以人事牽率。未果也。丙寅歲杪。重客洛都。
晤神田鬯。深譽天隨先生撰述之精。聲律之雅。心焉
志之。比來東京。疊承晉接。竝以所著秋碧吟廬詩鈔甲
丙兩籤見惠。攜歸客館。昕夕莊誦。覺歌行似太白。律詩
近少陵。樂府可奪鐵崖之一席。若宮閨豔蹟。國故餘聞。
長吟密詠。奄有吳祭酒之博奧。纏綿小詩。尤蓊麗。卑之
旗亭。定可博雙鬢之清唱。假令起禾原諸先輩於今日。
當亦悟冰寒青勝之有至理也。茲以丁籤付梓。屬序於

余竊謂詩學之道。要其端有二。一以典籍甄陶其情性。一以游覽開拓其胸襟。韞積於中。襮見於外。斯免貽譏下里。且可方軌前修。天隨產自博桑。風景清嘉。夙稱爲神山蓬島。鍾毓之秀。已自不同。又久官圖書寮。編修地居禁近。職隸承明。藜照餘輝。藉讀人間未見之書。平居收藏極富。四部而外。兼嗜稗官野乘。以故思發泉涌。魚龍曼衍。莫可名狀。頻年以來。雞林徧歷。燕南趙北。亦見游蹤。驛路經行。任吟毫之杼寫。方輿紀異。供本事之摺撫。是籤所載。皆其狙獯背上。錦囊中物。天隨年正強仕。率是以往。卷帙之豐。不可限量。放翁詩云。六十年來萬

首詩。將於天隨驗之。此卽甲籤自序期望之殷。而余欲以兩端自勗者。勗天隨也。殺青旣竟。仍希次第郵示。他年苔岑集。若有輯成之日。宜踵蜀韋穀才調集先例。不拘拘於時代先後。必以大作冕卷首也。丁卯仲春。毘陵董康。倚裝謹識於雙葉館。

秋碧吟廬詩鈔丁籤目錄

卷十


壬戌 古今體詩一百三十首

卷十一

癸亥 古今體詩一百十六首

卷十二

甲子 古今體詩一百六十首



秋碧吟廬詩鈔卷十

東京 久保得二 天隨

旭光照波 壬戌

滄海三千里。雲霞一萬重。玉壺寒尙漾。金暈彩初濃。曙
色杳拖島。浪痕明在松。炎輪頻炫轉。爛錦自搖溶。蘸岸
早潮漲。挾山佳氣鍾。乾坤方浩蕩。江漢亦朝宗。茲戴日
神裔。曾留徐福蹤。澄空絕烽燧。積水偃魚龍。浦溆晴連
互。梯航遠率從。昭回兼潤澤。九有樂熙雍。

上諏訪祠

冰湖明開鑑。八嶽衝穹蒼。淑靈茲磅礴。山川成保障。平

疇西盡處。古祠據崇崗。長杉矗如戟。白日嵐翠涼。涸陰
閉泉眼。壞道穿亂篁。蒼鼠出穴拱。墜葉紛滿廊。鼓笛聲
正絕。歸鴉趁昏黃。丹漆半剝落。緬懷歲月長。所祀是何
神。曰建御名方。材略由天縱。氣干牛斗傍。能伸鐵鉤索。
併矜膂力剛。臨陣久無敵。寰宇期一匡。夙輔父兄業。草
昧勳業彰。餘威震南海。中州居太康。誰來傳神敕。騶從
亦堂堂。國土要相讓。真主歸天潢。年少誤負勇。資性元
倔強。言辭恐欺瞞。搏戰枉頡頏。奔竄路千里。到此煙水
鄉。投戈甘恭順。知命還非狂。翻輸天孫貴。抽身守邊疆。
吾武豈無用。去拓鹿豕場。唯幸多男子。鴻圖更恢張。一

舉鋤頑獷。不復容陸梁。爾後稱東藩。扶翼皇運昌。既免
爲黃能。功烈洵異常。雲仍安其土。連縣承嘉慶。伏臘儼
祭享。儀禮何煌煌。叔世嗟衰替。勝區閱滄桑。神宮寺安
在。荊棘地蔽藏。猶見威稜凜。顯靈降百祥。流峙總依舊。
一氣變雨暘。遺澤仍不竭。陰火沸溫湯。沮洳葑作田。膏
沃宜稻粱。佳景唯當比。水墨描瀟湘。芙蓉倒影小。綠波
漲陂塘。隔水下宮在。棟宇遙相望。妃子亦血食。令德勝
英皇。祈賽共有驗。流風被遐荒。日月不曾墜。終古瞻輝
光。

寓樓小集賦似鵝湖吟社諸子

天繪煙嵐景。地開山水國。平湖一澄深。亂嶂爭欵仄。既舒曠士懷。朝暮宜探陟。形勝占上游。禾稻亦滋殖。想像秀靈鍾。百世足楷式。文章必超妙。人物亦英特。繹之我心傷。今古蕭條極。但至寄蹤者。一一堪追憶。昔有僧雪村。鴻爪遍禹域。岷峨集成後。迴錫此棲息。風月初著價。佳句清而刻。慈雲寺仍舊。樓臺踞湖北。次有機山公。夙好歸翰墨。矧復霸略豪。宛似曹孟德。遺篇皆幼婦。語語寫胸臆。湖心葬金棺。絕憐時命塞。今夕是何夕。雅會期無忒。蜺白與蝦紅。喜非爛腸食。吟社乃勃興。約束須嚴飭。誰爲丹穴鳳。一鳴服短翼。醉裏詩思雄。如劍新磨拭。

敲缶歌正長。萬籟暗而默。顧予桑梓近。夙因拋不得。寧辭執鞭勞。輸誠情無匿。諸君盍自奮。斯文且努力。妙在意言餘。清真謝雕飾。風流趁前賢。幸解群俗惑。文彩朗相映。湖山添生色。瓶梅香溢座。簾底燈焰直。夜深霜氣凜。四壁寒惻惻。凍空月上遲。沙樹帶煙黑。仰瞻星聚奎。光芒眉宇逼。

讀思誠館記爲關新水子爵

博直

元和偃武後。奎運初隆興。泮宮競輪奐。列藩互相矜。偉哉建德公。任用皆賢能。滕亦爲善國。治化世所稱。武城絃歌盛。釋菜舊典仍。祭酒常得人。學徒來擔簦。思誠人

秘碧山廬詩鈔 卷一
之道業履有準繩洋洋聲教宣民心長服膺殿堂與門
庶儼然據崗陵已經十餘紀法故猶可徵昭代錄遺德
鳳詔恩寵增草木霑雨露靈爽亦有憑茲告後來者莫
言力弗勝專心趁賢哲景仰休斯承

霧淞

霧淞南豐句且矜筆力雄水花船山詠宛見刻劃工方
言各雖異其物元相同造化恣遊戲街奇變不窮想當
嚴冬候深夜天無風水氣濛欲霧峭寒盡銳攻冽冽豔
於雪萬玉何玲瓏銀母爛匝帳水精儼築宮枝枝裹無
隙花花團作叢勝賞真頃刻偏恐晴日烘昔我登赤城

乘曙攀巖崑幻景賺人甚近視翻無功屬者滯鵝湖詫
之有老翁唯憾時不利惆悵又歸東豈圖經旬後偶爾
慰幽衷乃知懷正直與神能感通昨宵小雨歇凝陰逼
簾櫳早起倚欄處冷光眩雙瞳旋看火輪輾天地瑪瑙
紅諸品倏滅沒豁然悟色空新詩繼曾張苦思吟未終
二氣所消長何須問蒼穹或謂爲兵象或謂兆歲豐衰
職寧有闕燮理望諸公

越谷看梅同荒浪煙厓春日井柳堂

月地雲階感昨游軟紅塵裏日搔頭閒情一味相憐惜
賦到梅花便合休

麥隴蔬畦一路長。梅花簇處認村莊。東君留護多情思。
雨洗風吹不減香。
芳時游屐自成蹊。真賞無人試品題。迎我寒花催放盡。
重重如雪壓枝低。
標格孤高絕可人。枝枝綴玉已攬春。梅花本與招提好。
淨地漾香煙景新。
黃鳥聲圓天放晴。一園苔竹午寒生。翛然獨立風塵表。
看取花疏韻更清。
萬朵花開白作團。暗香脈脈盪微寒。帶苔老幹尤奇崛。
步繞孤根子細看。

無復驕春習氣存。高標只要素心論。何人占得幽閒地。
萬斛香中靜掩門。
佇立梅邊敲句初。風微日澹影疏疏。何由楚客漫閒却。
仍有清香能起予。
天然凝白謝鉛華。花發南枝故故斜。我亦人間嫌熱鬧。
擬從幽處了生涯。
細細風香入袂吹。一彎流水繞疏籬。似曾相識嫣然好。
薄暮野橋移屐遲。

駕鋼索車登早雲山。憩山腹孤亭。賦此題壁。
一線機牽鉤。輕車登峻嶺。粗同轆轤動。犀斗出深井。誰

秘碧山廬詩錄 卷一 五
也欺化工。刻苦巧思。騁無復勞縛屐。舉足遠塵境。嘯傲
恰有臺。曠覽頻延頸。四山如環合。朵朵嬌鬢整。微暄殊
可人。熙熙晴日罔。洞壑爽氣浮。午靄刷空永。中和節正
過。生意始堪省。草木皆欣欣。向榮色自艷。青繚而白繞。
原隰開遐景。掠簷者何禽。破寂一聲警。回頭都門裏。羣
小爭微幸。而我鬢已華。蜚遞志未遂。物外偶一游。灑然
世事屏。妙悟中心愉。茲與清虛併。坐久日西傾。顛倒亂
嶂影。地獄硫霧生。林岑暝更靜。歸路又忽忽。下險真俄
頃。天風起兩腋。飄飄雙袖冷。

同好文會諸子游雲州車中偶得。

一山聳崔嵬。一山橫夭矯。行見兩山重。峽蹙澗流小。
湖岸草煙碧。馬山殘壘荒。傷心爭戰跡。終古一斜陽。
莽莽魚龍變。濤聲自古今。隱岐何處是。日暮海雲深。
仙嶽削芙蓉。去天纔咫尺。晚來雲一團。護我振衣跡。
一過三百程。飛輪似電掣。朝賞嵐峽花。夕看大仙雪。

謁大社

鴻荒遺跡客來過。仍覺英靈氣不磨。久矣烝禋經伏臘。
依然形勝贖關河。辛勤曾作興基壯。功烈偏於讓國多。
拜罷祠前又昂首。宇迦山色碧嵯峨。
崇祠十丈自巍然。不管滄桑歲月遷。山擁鶴龜多瑞色。

秘苑吟廬詩鈔 卷十
花排桃杏鬪春妍。簫聲徐出青霞裏。棟勢高抽白日前。
流到郭西如戛玉。素鵝清絕水涓涓。
寶庫千間傍闕宮。縱觀盡日感無窮。珠璣漆匣螺鈿麗。
龍虎檀槽金縷工。秋入笛腔堪裂石。夜飛劍氣欲成虹。
幾多故物閱興廢。仍在鬼神呵護中。

稻佐濱晚眺

極浦潮滉漾。盡日鷗夢閒。西到石州境。洲渚曲作灣。入
春多漁獲。急艣飛舸還。沽鮮人來聚。沙溼似市闌。振衣
巨巖頂。長風吹我顏。天末青一髮。應是三韓山。夕陽如
輪大。輾向滄波間。萬道餘暉麗。霞色紅更殷。天使昔降

臨。勸說辭令嫺。克服大國主。獻土無偏慳。又思征俄役。
一擊懲驕頑。礮火遙可望。戰聲震九寰。往事眼前在。感
慨不可刪。終古只如此。皇威覃遠蠻。移步時迴睇。夜煙
海門關。魚龍避影竄。一鉤初月彎。

古墳行

出雲之地。最多古墳。在今市塚山及大念寺者。邱隴
雖大。惜失原形。但在鹽冶村森山綠園。白十郎庭前者。
頗推完固。予歷觀之。乃作此詩云。

維昔素尊誅鬼蜮。雲中早肇冠帶國。井邑猶存馬鬣封。
當時厚葬堪追憶。度數宛然同殷周。十丈起墳峙高邱。

秘碧吟廬詩鈔 卷一
其中羨道通玄室。青石作棺骸可收。一彈指頃忽千載。
人世容易陵谷改。豐碑倒折華表摧。珠襦玉匣今安在。
白光如練射眼明。金蠶飛出起雷聲。幽隧俄開長夜盡。
左魂右魄一時驚。推輦曾是拋鉅費。若非達官必豪貴。
風水依然陳跡非。可憐空曠無精氣。死生茫茫何足云。
賢愚天壽亦難分。且囑鬻骸入我夢。酌酒先弔冥漠君。

碧雲湖權歌

垂楊渡口雨初晴。萬頃淞波一櫂輕。日午湖煙散無跡。
大仙秀色最分明。
錦鳧驚起影成雙。波蘸桃花沒石缸。譜得安來歌幾曲。

漁娃水調試新腔。

八雲落日潑餘暉。短舸忽從湖口歸。作意東風晚來急。
紅桃花點白鷗衣。
詩碑留在美人洲。桃葉桃根笑盪舟。豔殺風流玉池老。
一時遊戲亦千秋。
朝看美保關雲斂。夕望宇迦山色奇。何若平湖三萬頃。
佳人打槳月明時。
風寒水國落梅初。微月澹煙沙樹疏。點點篝燈燒波赤。
潮平半夜網銀魚。

登千鳥城天守閣

秋碧四廬詩錄 卷十
九
譙樓百尺試登攀。積翠遙林指顧間。如許金湯空歲月。
天然圖畫此湖山。好花恰作三春豔。勝地誰消半日閒。
倚檻遲留仍怯雨。午煙如夢擁螺鬟。

松江諸士招飲臨水亭。

春寒水閣話襟期。賭唱高王我所思。嶽色當欄斜日澹。
淞波盪岸片帆遲。儘教妙妓度新曲。矧有可人同舊知。
坐到興酣須卜夜。一尊綠酒半傾時。

同僚友游伊豆山。

久思南豆勝。休沐偶相尋。茲脫風塵累。初知造化心。三
崎鯨浪杳。七島蜃煙深。呼醒曾游夢。欄頭試醉吟。

登小田原城天守閣址

南望滄溟開。白帆小於鷺。西控函關險。溪壑皆煙樹。興
基記早雲。亂世乃馳鶩。雄威震東邊。羣豪爭趨附。百年
矜榮華。一朝傷末路。豚犬竟無謀。枉恃金湯固。後來受
封者。亦在親藩數。海道扼咽喉。悠悠歲月度。今歸天家
有。結構雅而素。舍人當灑掃。竊待翠華駐。我從南豆還。
容與此小住。亭臺已拜瞻。後園又移步。滿地瑤艸長。花
花晝帶露。一塵飛不到。瀟灑饒佳趣。去尋譙樓址。石壘
仍如故。攝衣試登躋。臨眺勞指顧。興亡一彈指。孤懷向
誰訴。只須寓鑑戒。留題著佳句。根觸古意多。天低乍薄

暮雨氣迷遠近。海山濛欲霧。

岐阜雜詩

雨裏川光澹欲無。金華山翠更模糊。雲嵐襯染林篁暝。
幻出南宮破墨圖。
當日繁華據上游。劫餘歲月水同流。輕煙澹粉無人問。
燈火淒涼十八樓。
依然月細與風尖。江閣何辭作久淹。夜自絃歌聲裏鬧。
竹枝一曲憶森髯。

登金華山

山從信飛來。橫截濃州半。金華劃其南。巉然崖勢斷。松

檜擁一岑。白雲展如幔。古城存規模。譙樓衝霄漢。緬想
織田公。臨戰常多算。昨拜天子詔。誓欲靖禍亂。一擊舉
金湯。梟雄已鼠竄。唯憾多慙德。千秋存疑案。岐阜擬岐
山。命意自堪玩。一簣雖缺功。有人任翊贊。四海烽火熄。
蒼生免塗炭。霸跡悵堪弔。矧復富殊觀。樵徑度羊腸。客
子皆魚貫。捫蘿窮絕頂。舒嘯放眸看。平楚綠連天。斜陽
霞色爛。天風雙袖輕。雨後嵐氣漫。暝色生林杪。掠耳一
鶉喚。形勝終無用。興亡眼前判。悠悠三百年。飄瞥滄桑
換。古意吟不盡。翻爲廣武嘆。

輓森鷗外祕監

林太郎

知己感深經幾年。追隨日夕便駢肩。心腸是錦才堪妬。咳唾皆珠句可傳。何幸出身逢聖代。仍期力學趁前賢。昨宵空碧文星墜。乍接凶音一泫然。

仕路辛勤不惜身。功勳聲望共超倫。終生心血期醫國。早日刀圭亦活人。研學名都記螢雪。從軍絕塞慣風塵。金鑾寵召天恩渥。東觀仍留一老臣。

東西載籍夙兼修。藝苑名聲在上頭。夜雨一簾宜鍊想。霜華兩鬢最關愁。胸藏造化降神鬼。文有光芒貫斗牛。長記舞姬哀怨極。新詞幼婦最風流。

巋然仰見魯靈光。蘊蓄逾深志氣昂。便到晚年耽考據。

竭來季世賸文章。頻抽鄴架書香溢。獨對韓檠秋夜長。如此軼才終不壽。惜君錯負養生方。

八月將游朝鮮賦此抒懷

兩著蓮嶽屐。三放玄海船。北窮蝦夷境。南窺鬼界天。千里一過飛步穩。長房縮地亦徒然。回首鴻蹤遍海內。當日個儂猶少年。獨奈三十而立後。滿腹文章命不偶。仲蔚臥蓬蒿。身世局促久。有時又學信陵君。枉親美人與醇酒。性之所適無外求。依舊登山臨水足散愁。兔青鴨綠接遼瀋。寧厭天涯道阻修。擲杯而起掉頭去。乃當大陸取次試敖游。金剛之山青簇簇。此間化工鍾靈淑。萬

秘碧吟廬詩錄 卷十
二千峰如列眉。百丈石壁懸飛瀑。旛幢飄處知有寺。手
拾芝草趁麋鹿。衣冠藪澤推漢陽。伯玉碎琴氣倍昂。松
都遺墟嗟歷劫。先拜鄭公舊祠堂。柳京淹留莫累日。可
憐風月易斷腸。扶餘尙賸山河固。停筇平濟塔下路。雞
林葉落顥氣高。滿目邱隴皆陵墓。曾繙前史詳興亡。弔
古處處成小住。嗚呼我骨瘦聳秋山之嵯峨。我胸濶容
大海之滄波。加以慟古傷今之清淚。與夫擊筑敲缶之
狂歌。一洗心中不平事。最是生境發興多。三萬六千等
短夢。今我不往奈老何。

釜山卽目

鼇擲鯨吞浪作堆。布帆破曉入東萊。永嘉臺畔亂雲合。
絕影島邊飛雨來。

漢城客舍。松田學鷗來過。喜賦。

笑倚元龍百尺樓。與君歌嘯氣橫秋。參商兩地頻通夢。
杯酒今宵始解愁。天遣河山供跋涉。老憑翰墨足優游。
微風欄角月亭午。露洗碧霄涼欲流。

寺尾公天。猛與忘機吟社諸子相謀。邀予泛舟漢

江。朴石雲。箕陽鄭茂亭。萬朝魚惠齋。允迪宋悔堂。

之憲鄭松里。鳳時崔梅下。永年韓惺石。永源尹東

菴。致醉諸君亦來會。醉中賦此索和。

秘苑吟廬詩錄 卷十
搖嶽凌滄思不羣。棠舟蘭棹趁斜曛。一天秋擺津頭樹。
隔岸山拖雨後雲。欲向江湖矜勝會。只須詩酒策奇勳。
扣舷四顧高歌發。髣髴魚龍出水聞。

昌德宮

幾多觀闕欲凌空。敦化門通昌德宮。豈翅稱臣趙佗智。
翻思獻土竇融忠。依然河嶽猶流峙。容易車書又混同。
八道齊瞻新日月。觚棱佳氣更葱葱。

祕苑

新晴移屐此徜徉。祕苑于今屬李王。樹挾風聲秋遠近。
山排雲氣路低昂。靈泉古井終無旱。飛瀑陰崖大有涼。

想得先朝公醺日。紅牙畫鼓惜斜陽。

景福宮址

維昔東方國太公。經營四載作新宮。花飛鏡落恨多少。
都在當初圖讖中。
無復西園秉燭游。幽花繪出故宮秋。忍看蛛網縱橫挂。
粉壁塵生慶會樓。
滿目滄桑似館娃。樓臺亦被劫塵埋。涼秋黃盡蘼蕪草。
廢苑誰來拾墜釵。
淒涼南內恨難消。池上無人一徑遙。墜粉漾波紅藕死。
西風吹度醉香橋。

秘苑吟塵詩鈔 卷十
一三
敗瓦殘磚積作堆。松聲薄暮爲誰哀。乾清宮外荒園裏。
時有承蜩老叟來。
陌上車塵隔面昏。老槐葉落鵲聲喧。秋陰欲雨晚風急。
殘日影低光化門。
一曲淋鈴不可聽。土花滿地有餘腥。料知深夜坤寧閣。
破壁生陰鬼火青。

景福宮詞

昭陽江蘸鳳山影。一帶春川開別境。苧蘿村外浣沙津。
妃子池頭阿環井。生小雛鬟貌出羣。鸞閨聲譽夙流聞。
風姿絕代同甄后。才調無前媿左芬。東園桃李頻開謝。

且喜蹇修勸婚嫁。令德莫嫌姨母行。徽音須致周南化。
步輦銀裝百兩隨。花描嬌態柳描眉。重熙堂上簫聲細。
蠟炬煙殘玉漏遲。五雲深處多樓閣。巨桷高甍迭參錯。
景福宮成大駕回。河清海晏宜行樂。綠綺牕中杏作梁。
滿簾紅雨燕泥香。羅襟淚溼君恩淺。妝鏡黛顰春晝長。
何由單坐排愁悶。日誦麟經陰惜寸。隋家偏詫女相如。
輸著婺華無忌怨。南內俄分鐘鼓娛。千金買賦事差殊。
寢門明日題堯母。早晚當披負屐圖。長慶樓前誰置酒。
薰天勢燄經年久。恩讎每誤是非心。雲雨只憑翻覆手。
螳臂龍車變可驚。九重城闕戰塵生。淋漓紅血當階灑。

倉卒青衣下殿行。豈若洞天閒抱膝。繁華夢醒憂思畢。
毛女曾逢得道年。鮑姑應有登仙日。忽報漢陽氛祲消。
免看末運繼前朝。南歸丹陛千官肅。北望朱陵一路遙。
從是垂簾稱二聖。居然古殿標勤政。華筵次第趁紛奢。
寧爲斯民間其病。宰輔位高楊國忠。膏粱子弟競豪雄。
侯家主第花臨檻。紫陌青門車鬪風。日日彤庭多寵錫。
遠方賓貢隨飛檄。趨炎附熱世情移。不重君親重姻戚。
社鼠城狐姦未除。六宮鼎沸瑣闈虛。新進簪纓皆白面。
清流覆轍共欷歔。肩輿竊出椒房往。匿跡何殊魚漏網。
重從艱險獲餘生。獨向招提著凝想。當日武關歸亦難。

竭來會面暫相歡。莫將血肉飶豺虎。四海蒼生心不安。
君王平昔憐如意。矧復戚姬能解事。野雉胡爲妬鳳凰。
于今人彘堪酸鼻。半夜醮壇殘燭青。象牀魘夢黑風腥。
非關巫蠱禍尤速。漫道神君術自靈。折柳歌酣春晚晚。
御街日暮停行憶。洛南小吏好容儀。天上樓臺留住穩。
蛾賊跳梁殺氣高。如何諸將怯弓刀。綏邊材略無韓范。
撥亂功勳思鄂褒。爛爛妖星射宸極。董逃清調聲悽惻。
義軍十萬自東來。個小朝廷要扶植。幾回罪己下黃麻。
烈烈南風又白沙。一任空堂嬉燕雀。爲誰平陸起龍蛇。
坤寧小閣無人處。複壁藏身且猶豫。月落松林燒寶衣。

蘇樓鴉叫天初曙。老去宮娥雪滿頭。進香時上玉壺樓。
荒園蟋蟀寒啼露。廢沼芙蓉瘦怨秋。他日君王猶掩涕。
太常乃議追尊禮。既聞中使到江南。旋見鐵椎穿地底。
八道山河變古今。洪陵草木與年深。玉魚出土再營葬。
金谷雲愁白日陰。事局觀來幾重複。始知才貌非爲福。
此生起滅等浮漚。歷世興亡如轉轂。別有頤和園裏人。
傳哀北闕又風塵。例餘家國無窮恨。劫後煙花慘不春。

元山

估帆來往不曾休。此地漕輸冠北州。今日繁華開井邑。
當年寇盜簇戈矛。蜃煙羣嶼天低處。虎氣千山地盡頭。

探勝自矜詩膽壯。長風吹袂笑登舟。

叢石亭

高麗史樂志曰。叢石亭。奇轍所作也。轍以元順帝中
宮之弟。仕爲平章。奉使東歸。至江陵。登此亭。覽四仙
之跡。臨望大海。作是歌。其辭佚亡已久。予偶乘舟過
亭下。慨然有懷。往古。乃賦此。以補樂府之缺云。

千仞石柱削蒼玉。參差簇立森似束。絕勝鑪錘刻琢功。
鴻濛氣鍾汀洲曲。大元使者披錦袍。江陵停車氣倍豪。
登高邱而望遠海。乃欲因之縱觀。八月濤。扶桑半夜天
雞叫。曦輪輾出光四照。滿目蜃煙一時消。長風吹入混

興途

稀碧山房詩錄 卷十 一
沌竅潮陣低昂空際來。餘勢直闖崖門開。欲折三千六
百之地軸。貝闕珠宮一擊摧。東溟西澗通尺咫。倒捲千
里黃河水。萬象起滅轉瞬間。翻思人生浮漚耳。今我居
榮顯。矧負椒房親。不做田竇爭奪劇。不學趙李經過頻。
羸蹶劉興異代夢。汗青每留戰伐塵。波平潮方漲。水天
唯一碧。遙指三山縹緲之樓臺。乘槎須趁四仙跡。

金剛山紀游一百二十韻

元化毓神秀。乃聳金剛山。泰華甘雌伏。芙蓉羞獨尊。巍
峩幾千仞。高標凌紫閣。蟠屈幾百里。宛作天地根。一萬
二千峰。峰峰互駢肩。曇無竭所降。衆生了淨因。上方殿

閣古。靈蹟長不泯。洞壑引人住。猿鶴與客馴。今我試探
勝。敢道造物慳。掉頭時大笑。一醉觴詠閒。夜自漢城發。
鐵軌掣廳輪。早涼夢易醒。晨到元山津。海波赤於血。若
木擎晴暎。浦濑鳥煙歛。洋心鯨霧殘。石柱含鐵色。欹立
森當舷。狂呼拍欄處。驚鷗白翩翩。棄舟長箭港。午潮碧
迴環。下車溫井里。野花秋便娟。峽底斜照早。天低歸鳥
邊。明日晴可卜。雲絮團峰巔。朝賽神谿寺。鐘鼓聽不喧。
松蘿青猶潤。淨地嵐光勻。短屐躡危磴。仄路凡幾盤。林
巒何窈窕。庶得逢神仙。一嶺抱一澗。險絕地自偏。山重
兼水複。宛開別乾坤。玉流洞何邃。湫流渦旋頻。飛鳳與

舞鳳上下泉勢分。忽驚峽天蹙。石屏兀嶙峋。瀑流所撞擊。茲開九龍淵。噴沫濺叢樾。谿底炎暑燭。流憩愜素尙。逸興逾騰騫。其翌過高城。墟落颺炊煙。赤壁江口潤。潮穩宜垂綸。巉巖擁曲渚。巨靈乃雕剜。縱橫斧劈在。崖面皆濤痕。幽宮萬怪聚。晴霄蜃樓懸。奇趣雖可賞。未必無等倫。浩渺三日浦。空水尤澄鮮。恨不蕩蘭槳。湖心弄清漣。豈乏濟勝具。隨處履險艱。駕言值早曉。行行距塵寰。松石骨非俗。一谿霞氣寒。萬相亭子上。棧閣相鉤連。文殊接勢至。玉女清而妍。千巖擁一壑。個個峻極天。神鬼仙佛魔。形貌子細看。化工誤銜奇。却少功力全。樹色不

蒼潤。源頭沙土填。且怪世人愚。茲來乃怡顏。峨峨溫井嶺。回望遠景新。平蕪海汀盡。波光浮日圓。輕車遲吾久。一路揚埃氛。疾如離弦箭。出沒山谷間。午到長安寺。香界傍翠筠。梵宮金碧爛。開基過千年。半宵夢屢驚。檐溜同瀉泉。溼及牀幃際。一雨瀾半旬。奔流漲更激。積翠濛作團。翻喜晚晴後。星月羅秋旻。喜極不成睡。出舍天始晨。樹梢擺殘滴。黃泉江尙渾。仰見明鏡臺。乃鄰地獄門。傳云通冥府。呵責聲亦聞。顛蹶怯亂石。石罅響潺湲。路盡水簾洞。亂泉忽飛奔。兜率茅菴廢。山風拂葛巾。如一跳而足。有臺曰望軍。高豎空中柱。鐵鎖手自攀。置身雲

霄上絕頂衣可振。神王縱目好。天地何漫漫。隨我一呼
吸。氣象變萬千。峰巒紛難數。摺疊疑湧瀾。了了辨溪壑。
煙嵐午氤氳。世界歸孤掌。雲夢八九吞。恍惚望瑤京。樓
閣鋪金銀。安得脫塵網。長住臥白雲。俯仰觀止矣。嗟予
筋骨孱。跬步洵不易。迂路尋靈源。而後趁暮景。歸來伸
脚眠。秋晴山迎曙。香爐生紫煙。懶翁留逸躅。三佛巖面
鐫。白華圓廬古。一境靜似禪。高僧蛻化久。亂草埋邱墳。
行過表訓寺。林杪飄法旛。正陽在其上。看山興不羣。萬
瀑懸洞口。八潭承驚湍。湍勢轉石疾。風泉響琅然。顧問
普德窟。懸空龕似船。步登摩訶衍。亂峰羅我前。一庭日

正中叢菊露未乾。追幽尋吾契。四大等幻塵。妙吉祥何
處。崖面苔作紋。百尺彌勒像。異相更精神。霧在嶺尤峻。
石疑戈矛攢。澗急絕無路。涓流可沿緣。樹聲不關風。崦
嵫斜日曛。暮雲低貼地。墮葉禽同翻。送險又有徑。繭足
誰相憐。榆帖蘭若近。疏鐘報黃昏。金佛五十三。遠自天
竺傳。東國布象教。或不待苻秦。詰旦僦板輿。疾驅下重
巒。滄溟湧脚底。早潮碧鱗鱗。離山荒塗盡。初得榆柳村。
普賢洞以往。一望開郊原。秔稻花正發。爽涼殊可人。涉
江未數里。溫井就午餐。壯游於是畢。漢城須早還。回踵
循舊路。舟車安且便。未窮毘盧頂。騰身叩天關。未訪松

林寺習靜住紺園。百塔與迦葉。巖洞奇趣存。雙龍與紫壁。瀑布傾長川。更想晚秋候。霜氣透嶺岼。紅楓映日麗。滿目錦爛斑。遠游久相慣。敢道超海難。幽僻探無遺。絕勝始可論。顧與山靈誓。重來期不愆。煙嵐倏變幻。歌罷仍盤桓。

南山雅集席上賦此索和。

晚聽梧聲警。披襟倚畫樓。燈華涼欲暈。人意澹宜秋。願縱一宵飲。共消千古憂。醉餘頻獲句。高會足風流。

松都雜詠

帶礪河山誓始終。操雞搏鴨負全功。可憐勝國衣冠盡。

二十八陵斜照中。

延慶宮前滿月臺。早朝此候殿門開。神嵩王氣消無跡。百畝毬庭長草萊。

彩霞洞口欲斜陽。偶訪遺蹤感慨長。兩國賢英觴詠日。可無勝概入文章。

圃隱孤忠繼者稀。石橋碧血是耶非。一塘殘柳水清淺。時有村娃來浣衣。

崧陽書院久聞名。廟宇丹青壯舊京。臣主荒唐宗社覆。千秋節義屬先生。

南大門前市井連。涼秋欲曙颺炊煙。巨鐘猶帶元時色。

叩月鳴霜七百年。

不是汗青千古垂。區區片石亦何爲。姓名已被黃塵浣。開殺路傍旌賞碑。

箕子陵

當平壤之西北兮。兔山兀而峻嶒。松榆鬱其成林兮。藏箕子之古陵。繫精爽之不泯兮。使佳氣自飛騰。昔帝紂之悖亂兮。兆淫戲於象箸。乃被髮而佯狂兮。甘爲奴而不去。顧夫比干之極諫兮。直剖心而莫疑。且微子之遂行兮。恐遭家國之阽危。晦先聖之謨範兮。蒙大難而明夷。生死難易雖異兮。稱三仁之共宜。所期在再造之日。

起任其重兮。故隱忍而窮處。旋值周之肇興兮。克使武王知彝倫所敍。既避地兮東徂。其居安兮自成都。八條之禁兮。導民敷德化於海隅。就殷墟之荒穢兮。只有宮闕成邱。覽麥秀之漸漸兮。與禾黍之油油。何亡國而無悔兮。傷狡童之不爲我好仇。率大人之正道兮。宗祀儼而長傳。其屈伸皆有爲兮。如夫子則吾無間然。或疑住于遼陽兮。其封疆未及此。彼井田之遺址兮。爲高麗之邑里。想茲天造之要塞兮。山川繆而四圍。眷子孫之拓土兮。魂來而憑依。嗚呼予懷之鬱陶兮。憤叔世之僞也。踟陳辭而布誠兮。欽明哲之志也。

牡丹臺

牡丹臺高扼天險。一帶連崗壘壁儼。大同江水繞東南。
雨後新漲綠于染。咫尺乙密呼欲膺。風飄巖花香奄冉。
其陰屹立立武門。白雲猶似旗影颭。忽憶文祿癸巳年。
牙營此據翠微巔。我軍苦戰驚礮火。煙塵滿目晝黯然。
退嬰門樓猶死守。孤城落日淒可憐。夜半直躡江水去。
一路南指漢陽天。又想明治甲午歲。清兵此憑負嵎勢。
我軍力攻自早晨。殺聲捲地霜鋒銳。滿山草木鮮血腥。
伏屍縱橫虜帥斃。明日投鞭鴨綠江。鼓角聲震遼海裔。
三百星霜彈指過。此地兩度交兵戈。一勝長驅亦容易。

一敗壯圖奈蹉跎。敢道將士殊勇怯。戰功元屬廟算多。
形勝分明歸指掌。古往今來感如何。浩浩天風起兩腋。
臺頂著個長嘯客。雲山歷劫尙金湯。寒流一道傷心碧。
堠樹遙連統軍亭。都是王師轉戰跡。天垂四野似穹廬。
無邊秋色關河隔。

浮碧樓

浮碧樓前秋水平。永明寺畔午煙晴。等閒閱盡紅羊劫。
金粉江山繪柳京。

大同門樓用倪謙韻

地連遼左起高臺。浩嘯憑欄眼界開。箕子兒孫向南去。

隋皇兵馬自西來。綾羅洲永煙霞錯。錦繡山橫紫翠堆。
江水朝宗海門濶。幾重蜃氣隔蓬萊。

平壤客夜

獨坐驛樓上。浩歌傾酒尊。此身倦爲客。明日欲回轅。隔
海家千里。中天月一痕。夜涼衫子薄。秋氣滿乾坤。

公州

依然形勝地。故邑是熊津。五峴晚陰合。三江秋漲新。降
旗旋出壘。戰骨早成塵。彈指過千載。興亡跡已陳。

扶餘懷古

鼎足雄圖幻夢虛。紛奢亡國竟何如。一時文物殘灰裏。

百戰山河落照餘。

壞宮荒草臥銅駝。劫後淒涼歲月過。賸見一基平濟塔。
紀功文字半銷磨。

黃屋倉皇運會移。三忠大節上天知。丹青廟貌凋零盡。
日炙雨淋存斷碑。

廢堞頽垣飢鳥號。經營尙憶昔人勞。自然形勝旣無用。
依舊扶蘇山勢高。

望海亭空瓦作堆。王興寺廢長蒿萊。傷心一片斜陽澹。
個個秋花夾路開。

舊苑荒臺草木繁。蕭條煙火欲黃昏。阿誰唱出山花曲。

游子青衫有淚痕。

白馬江頭王氣消。西風古渡柳蕭蕭。殺聲激盪今猶昔。鼉憤龍愁捲夜潮。

半壁江山保障雄。乾坤再造莫匆匆。君王誤壞長城了。成就劉家第一功。

阜蘭古寺傍江汀。雲溼陰崖龍氣腥。傳道王家此祈福。依稀金碧佛無靈。

隔岸浮山曉靄收。落花巖下住行舟。珠沈玉碎銷魂極。江水滔滔日夜流。

御筵留賞好風光。花柳錦江春日長。臺石自溫杯土冷。

可憐轉瞬判興亡。

城南浦記大王名。今古滄桑易愴情。錦纜牙檣何處去。連天綠浪野田平。

灌燭寺

鬱鬱盤藥山。徑仄雲磴危。招提境自邃。濁世可厭離。精舍金碧古。仍見規度宜。百尺彌勒像。巍然立巖陲。當初象教盛。佳瑞復奚疑。光宗乃發願。慧明此肇基。幸值昇平日。喜捨不惜貲。役人果幾許。閱年亦可知。端莊卅二相。雕塑無所虧。眉間毫光放。方冠瓔珞垂。龐偉罕其匹。于今矜絕奇。宛在兜率高。說法禮六時。緇素感報應。崇

秘苑 廬詩 卷十
信終不衰。我來一瞻拜。剔苔檢殘碑。諸天鐘聲度。斜陽
逼崦嵫。西風颯入樹。敗葉紛辭枝。歷劫傷末俗。吾生竟
何之。欲參龍華會。嗟爾下生遲。

入慶州

迢迢驛路挂城西。墟落晴煙日欲低。野笛吹殘黃犢臥。
何王陵上草萋萋。

武烈王陵

南川水奔注。西岳巖聳秀。平陸渺接天。井邑渾依舊。古
陵傍山趾。制度固非陋。園邱數仞高。亂草莫埋覆。螭首
與龜趺。奇巧餘鑿鏤。巨碑字如斗。玉筋原篆籀。昔當二

曼季陰陽迭錯謬。危邦召禍頻。豺狼未息鬪。惟王經艱
苦。才器實天授。龍飛運可乘。果然時望茂。倉廩既充牣。
何羨晉楚富。兵馬既精強。最重股肱守。結唐作後援。併
濟弭餘寇。願滅高句麗。疆土加延袤。大星落賊營。萬衆
咸駭走。茲開統一基。皇天須眷佑。一朝井水紅。上主終
不壽。橋山弓劍哀。北極變樞宿。儲貳幸有人。誕啓神明
胄。老臣亦忠良。遺圖克繼就。悠悠一千年。功烈猶可究。
桑華載籍存。庶得補罅漏。園寢絕樵蘇。林莽栖猿狖。依
然江山壯。精爽彌宇宙。

慶州覽古十二詠。用徐四佳魚西川唱和原韻。

廟門不鎖石爐涼。樹樹幾經秋葉黃。河嶽于今存氣象。
兒孫終古作侯王。闕宮夜暗鬼神會。破巷草深城郭荒。
試問虎挐龍鬪跡。西風一笛怨斜陽。
雞林靈異

獨立南維作鎮宜。幾多軼事記前時。依然古佛長留像。
無復狂僧解詠詩。萬壑松聲含雨急。半山磴勢入雲危。
怕過蟹目嶺邊路。秋草_獨陵風亂吹。
鼇山奇勝

槐樹蟬嘶過客稀。停筇棖觸欲誰依。千秋讌飲危機伏。
一代君臣末運非。若有義軍殲蛾賊。免看恨血灑龍衣。
流觴曲水遺蹤古。鮑石亭前弔落暉。
鮑亭感懷

野色蒼茫水上村。廢塘曲曲草煙繁。當年豺虎宵傳警。

廢

今日桑麻晝掩門。厭聽晉宮多穢事。絕憐漢帝泣奇冤。

淒涼不盡興亡感。枉倒茅亭酒一尊。
蚊川聘望

尋到瓠公故井西。秋來客思有餘悽。頻經喪亂居民少。
遙指招提去路迷。歸正門前山簇簇。朝元殿外草萋萋。
雨淋風打過千載。忍見荒祠墮粉泥。
半月故城

瞻星臺古尙崢嶸。疊石層層儼似城。閱盡劉興與嬴蹶。
如何地覆又天傾。斗牛南向秋無際。河漢西流夜有聲。
破國矧看金寶氣。竭來俯仰一傷情。
瞻星老臺

三層白塔聳蒼旻。咫尺故宮秋色新。休說空王靈有驗。
何堪淨地寂無人。干戈滿目前朝史。風露傷心遠客身。

眉雪老僧諳舊事。仍矜傳法自苻秦。

芬皇廢寺

巍峩西岳遠煙蒼。颯颯風篁作早涼。狹巷廢蹊多斷礎。

鐘沈魚默又斜陽。九天何處看花雨。十地誰來禮竺皇。

知與梁家同劫運。金銀巨剎委榛荒。

靈妙舊剎

抔土生苔虎氣銷。豪華一瞥似南朝。殘山賸水增悽愴。

玉匣珠襦寂寥。月黑故墟羣鬼哭。風高永夜萬星搖。

至今蘿井傳奇瑞。獨奈滄桑世代遙。

五陵悲弔

江山歷劫昔人非。烏帽筇枝久不歸。攜酒陶潛好相伴。

登樓王粲儘無依。一池水涸芙蓉瘦。四野秋闌穉稔肥。

太守風流跡堪續。浩歌欄角對斜暉。

南亭清賞

回首
李

煙水龍吟韻更新。細聽滌得六情塵。星臺月巷憶前代。

石堡金城非舊春。警夜有聲疑裂管。臨風何曲最愁人。

一從吹罷萬波息。浩劫羅都偏溼巾。

聞玉笛聲

手濟邦家累卵危。才兼將相最英奇。水魚已得君臣契。

伏臘猶牽父老思。運定三分歸統一。時清萬姓免流離。

松楸滿目賸精爽。步向谿山猿鳥隨。

過度信墓

佛國寺

古塔記羅代。招提尋聖蹤。煙拖遠村樹。日落上方鐘。勝

境栖心好。高僧握手逢。寥天鶴歸未。嘯詠倚長松。

石窟菴

秘苑 卷一
磴道離初地。慈雲低繞麓。踰險更向東。石窟依山腹。其
口窄於隧。兩壁高轟轟。初逢八金剛。神威不可瀆。數步
俄豁開。道氣此孕毓。瞿曇坐蓮臺。毫光射人目。背後有
觀音。慈容聖而淑。側立十羅漢。無一不虔肅。頂禮幾菩
薩。面貌殊清穆。圓井花瓣重。眼前瑞雲簇。手法妙無雙。
都出新機軸。借問彫工誰。絕技今仍獨。貧兒金大城。依
母栖白屋。喜捨祈來世。乃享清淨福。轉生在名門。才德
與年熟。一朝登相位。光彩被九族。發願報佛恩。萬姓咸
悅服。施財土木興。力作竣工速。法界一莊嚴。金碧輝阜
陸。魚山梵唄清。豺狼亦馴伏。如何破國後。傷心變陵谷。

湮晦閱年久。花龕土中蓄。掘之規制全。個個無傾覆。翻
惜修治拙。古色終難復。象教久陵夷。世運如轉轂。賸有
朝露身。浮生輒困蹙。苟去斷常見。此生猶可卜。莫伍蚩
蚩氓。名場浪奔逐。諸佛恍來迎。雨花散芬馥。好是咫尺
地。幻出小天竺。

蔚山懷古

蔚山城外賊遍野。孤軍嬰守殊衆寡。當初彈正託其兒。
負約何以立天下。銀兜鐵鎧虬髯張。濶步入城自鷹揚。
從來夜叉破人膽。威容固軼關雲長。十萬明軍築長圍。
百道頻放佛郎機。漫矜掃箠謀尤易。寧知力取事總非。

雲長
荆州
某持
陽自

要地誓不失尺寸。意氣自若迎敵健。將士死戰皆裹創。
 天寒糧盡更困頓。夙推帷幄韜略精。神兵四至衝賊營。
 頓令烏合如雲散。百里驚倒風鶴聲。憐君功勳憑艱苦。
 翻與噲等為其伍。故國振旅歸亦遲。無人相見呼阿虎。
 當時壘壁儼然存。蒼涼猶疑殺氣屯。登登一路幾盤曲。
 西風吹亂秋草繁。浩歌酌酒弔陳跡。賸見形勝仍如昔。
 舞龍山色蜿蜒青。太和江水汪洋碧。

東萊弔宋象賢

黃塵暗天起。肉食計全非。列鎮猶高枕。孤城已合圍。決
 然殉家國。何暇顧庭闈。血食祠堂古。純忠似爾稀。

東萊

血食

源

東萊浴舍題壁

梵魚川畔一仙源。隨處高樓簾影翻。山帶煙嵐圍地僻。
 天收瘴癘發泉溫。秋風古渡菴葭水。夕照平疇羅村。
 維昔羅王頻駐蹕。行宮銅柱舊蹤存。

金海納陵

九千禊洛日。龜旨山有聲。撮得峰頂土。歌舞趁晚晴。紅
 幅裹金合。半空垂紫纓。六卯化童子。首露殊俊英。月望
 乃即位。恩德覃蒼生。國號大駕洛。五部皆輸誠。經始且
 勿亟。農隙力可併。佳氣一鬱葱。觚稜壯新京。皇天降淑
 質。緋帆超大瀛。迎之正其位。坤德歸幽貞。御宇十餘紀。

寰區慶昇平。當其登遐日。百姓咸傷情。十世五百歲。式微社稷輕。餘裔鳴羅代。青史長傳名。聖神賸遺烈。浩氣彌太清。園陵渾依舊。規儀終不傾。

舟中讀李忠武全書賦此志感

天教英傑濟危邦。幾經險艱氣不降。雖然公敵堪起敬。材武韜略固無雙。虎榜出身初祿仕。多年蠅屈簿書裏。豈圖八道捲煙塵。鳳詔一下蹶然起。意匠經營創鱗鱗。龍頭龜尾出新工。直衝列艦頻發礮。慣用長技在火攻。巨濟洋上酣戰日。孤軍佯走誘敵出。旌旗靡處陣勢回。縱橫馳突成功疾。其時指麾立船舷。飛來銃丸中左肩。

貓

割肉探丸血注踵。神色不變笑靦然。運籌堂裏容衆議。橫槩賦詩亦高致。從是日軍進取難。海陸呼應不如意。底事羣小構讒誣。黑獄銜冤形影孤。可憐元均驕豎耳。閑山失守兵氣沮。重拜恩命爲奮激。久矣眼中無一敵。西風寒盪碧波亭。鐵鎖絕流橫。攻擊他時順天飛警聞。海上百里漾血雲。恨被都督枉牽制。不因快戰策奇勳。夜深鷓鴣俄解纜。此讎若除死何憾。大星狂流爛有芒。觀音浦頭鯨霧暗。靈鼓齊進天始明。健鬪數刻亂殺聲。噴筒飛燄潮色赤。火龍躍水馮夷驚。丈夫報國餘烈在。巨彈洞胸臣无悔。唯聞三軍慟哭哀。清淚齊濺露梁海。

一身支持小朝廷。勳業赫赫照汗青。謚曰忠武廟。忠烈血食千秋仰。精靈歸舟蹴浪浪花碎。一杯桂醕那邊酌。煙水微茫日向西。天末遙山橫翠黛。如公今古有幾人。當年諸葛定同倫。數卷遺文誦方畢。唾壺敲罷感慨新。卽今桑椹歸一域。倍思流風足矜式。願公早晚出替人。長護金甌無缺國。

望對馬島

瀚海當中螺髻堆。破帆風急自西來。銀山素霧天文變。鰐浦黑濤魚陣回。此去滄瀛可飛渡。昔聞寇盜足驚猜。舵樓背指三韓杳。雨氣蒼茫落日頽。

題菊池梅軒寫第五隆

卽野呂介石

熊谿圖卷後瀧川君

山資言囑

年少裘馬擅風流。蓬桑夙志容易酬。歷遍蜻蜒洲首尾。夢寐猶思南紀游。蜿蜒巖巒傍岸走。萬派會流玉井口。舟自蛟龍窟裏回。絕奇應在瞿塘右。九里峽天一線長。山重水複應接忙。出險心平便停棹。丹鶴城外欲斜陽。去尋那智千仞瀑。驚聞霹靂摧地軸。雄風大壑雲亂飛。白雨四時灑林麓。不獨谿山靈秀鍾。蒼茫古意盪吟胸。當初神武誅鬼蜮。後年徐福又寄蹤。介石山人善墨戲。大癡遺法推高致。苦問粉本是何山。賴家小豎漫多事。

秋碧吟廬詩鈔 卷一
濟勝熊谿五十回。有時飛步度崔嵬。山勢起伏如馬背。
一踰混點八面開。看盡雲煙無定止。胸中久蓄眞山水。
髣髴天池石壁圖。縱筆揮灑逞絕技。聲價逾高鬢已斑。
偏惜縑素落人間。想到荊浩住洪谷。粗同王履畫華山。
就中此卷存規制。回首歲月同水逝。居然傳神足典型。
名手臨摹用意細。斯境斯筆兩相宜。故人收藏喜可知。
慇懃封寄許觀玩。日日蕭齋掩卷遲。好景賺人煩襟釋。
恍疑南紀重著屐。一水截地灘聲高。萬峰隔煙黛痕碧。

大原陵

三路賊騎捲戰塵。鑾輿相踵出京闈。古來未有流君者。

嗚呼誰復非王臣。顯皇在隱岐。順皇在佐渡。隔絕千里
信不通。絕海風濤空朝暮。一自鼎湖棄人間。侍臣東西
護骨還。生前重逢願空負。身後分領此青山。聖心何曾
忘豎子。他年族滅亦天理。當初難除一陪隸。王家式微
可知耳。

醍醐

醍醐山嶮巖。孤雲拖林麓。聖境遠塵俗。精藍倚中腹。雖
歷紅羊劫。舊觀旋興復。臺殿一莊嚴。金碧眩人目。想當
清梵斷。石鼎茶初熟。諸天花雨來。戒壇香馥郁。我過三
寶院。禮佛祈淨福。後約庶不違。一路趁白鹿。絕頂旛影

秘碧吟廬詩鈔 卷十
搖諸天秋氣肅。歸禽背夕陽。暝色籠平陸。

湖上雜詩

滋賀故都阡陌荒。湖山形勝尙金湯。野櫻曾入薩州詠。
墜葉成堆秋色黃。

絕代才情迴出羣。無端閨夢誤夫君。埋香瘞玉誰相弔。

紅樹深藏內侍墳。

澄徹空潭水不腥。一行白鷺下前汀。午煙初斂晴如拭。

千仞比良舷首青。

遠山黛色一蒼蒼。平楚彎環洲渚長。水碧沙明人倚櫂。

綠蓑衣帶白蘋香。

宛在中流島樹妍。鯉魚風裏疊清漣。仙壇今日重題句。
一自褰裳二十年。

湖天日落暝煙幽。襯得青山紅葉秋。遙指上方長命寺。
西風古岸不維舟。

午夜松聲驚似濤。新寒吹透木綿袍。傷心澤國雁來早。
七十二峰霜氣高。

偕樂園酒間賦似朴石雲。鄭茂亭。魚惠齋諸君。

漢城會面了前緣。洛下重逢笑拍肩。靜夜記聞梧葉響。
清秋須醉菊花天。可人襟韻已如此。名世文章非偶然。
話到同心頻抵掌。當欄明月亦團圓。

寄魚惠齋

都門成小住。霜鬢鏡中看。落日鄉山遠。西風客夢寒。傷時頻痛哭。了事幾艱難。千里歸須早。崢嶸歲又殘。

同好文會諸子飲松泉閣

會客

一尊秋可餞。雙鬢故蕭騷。松氣侵簾幕。泉聲入夜高。詩中頻罵俗。醉裏好揮毫。狂簡性難改。仍矜湖海豪。

國分青厓

高胤

過訪酒間賦似

消寒小閣酒盈缸。談笑對君心自降。海內文章誰第一。醉中意氣固無雙。寥天星爛霜生壁。永夜風高葉打窓。不怪羣兒總低首。黃金猶鑄賈長江。

魚惠齋西歸後久無音信乃寄此問訊疊韻

忽忽分袂後。窮臘眼前看。大地新霜肅。重溟積水寒。蹇予款交少。與爾後期難。落月臨梁處。傷心夢正殘。

江木冷灰招飲偕樂園

今夕是何夕。當筵談笑宜。疏狂常縱酒。措大例耽詩。惟爲聞名早。偏嗟識面遲。燈華剪還落。霜氣入簾時。

松阪客寓賦似達本耕堂

清藏

可堪都市裏。臘後更摧顏。千里無艱阻。一旬能往還。開尊逢舊雨。爲客得真閒。散步好攜手。郭西看晚山。

蒲城懷古

松阪近竹都。堠樹連海嶠。街西岑阜紆。地形當樞要。緬
想蒲生公。英才仍年少。版築費經營。樓櫓勢斗峭。方召
著勳早。移封向北徼。次歸紀侯有。親藩威望邵。鉅商善
貨殖。富與晉楚肖。碩學施教化。曾被安車召。三百星霜
古。廢壘纏蘿葛。衆庶記舊恩。南龍儼有廟。金湯今何用。
只任行客弔。我來屬臘餘。憑高一以眺。亂水繞郭奔。四
山帶斜照。霜天開似蓋。晚霞紅于燒。野色看赴暝。林杪
飢禽叫。疏鐘一杵殘。長風入萬竅。

鈴屋翁故宅

大人困猶亨。隱居在幽僻。公侯時納贄。聲名當代赫。斯

道自祖宗。終古無變易。要祛俗儒見。發憤究載籍。夙誦
古事記。刻苦著箋釋。一腔血瀝盡。雙鬢霜既白。聞當樓
居日。疲倦毫欲擲。鈴聲每遣悶。寸陰洵可惜。蘊蓄與年
深。疑義細尋繹。英氣凜不磨。異端嚴貶責。東方國體尊。
徵證太明覈。平生愛櫻花。方寸此心赤。遺業足千春。乾
坤留精魄。聖代經旌表。依然存故宅。移向城墟西。軒楹
如疇昔。堂前古苔深。堂後叢篁碧。手藁與刻板。共免蠹
壞厄。爾餘饒珍玩。庫中堪壅積。徙倚欽高風。無奈幽明
隔。新詩抵大招。髣髴神來格。

游瑞巖寺

郭西四五里。亂山嵐翠濃。孤村畦圃荒。時節還窮冬。危塗礙屐齒。爽氣來盪胸。寒水澄且綠。池面涵雲容。蹇步到谷口。泉聲玉琤琮。其上蘭若古。參差臺殿重。洞壑何窄黝。檐端抽數峰。黃葉積成堆。後凋唯有松。登樓縱遐矚。飛禽杳無蹤。平楚東盡處。滄海波搖溶。既脫人間累。此獲林下悰。萬象一超迴。爭將詩料供。澹煙遠相曳。隔塢斜照春。蒼然暮色至。敲殘上方鐘。絕境愜予意。一去何日逢。浩焉發高詠。迴睇仍倚筇。

秋碧吟廬詩鈔卷十

秋碧吟廬詩鈔卷十一

東京 久保得二 天隨

元旦雙鑑浦觀出日歌癸亥

五更沙濼人如市。耿耿燭殘古祠裏。長風簸海海欲傾。潮氣噴面寒於水。拂曙微白生自東。積陰解駁次第空。疊疊雲霞成五彩。餘輝忽射魚眼紅。陽烏騰翥鼓其翼。一舉容易凌紫極。中天高擎赭玉盤。滄溟變作爛銅色。恍聞扶桑雞一鳴。重光普照萬國明。想到天地分割始。六合廓然佳氣生。十丈巉巖從神代。波間雙峙屹相對。須臾潮漲鏡面磨。參山遠山青似黛。斗杓昨回又挽春。

眼前風物一番新。既有秀靈盪胸宇。顧我亦非去年人。
多事夸父渴追日。揮戈魯陽果何術。苟免倒行與逆施。
不妨羲和著鞭疾。

烏羽港

飄然笠屐遠相尋。畫裏仙區自古今。極浦帆光煙嶼隔。
一汀魚氣晚潮深。遲留要攬海山勝。浩蕩亦同鷗鷺心。
打槳漁娃歌水調。紅樓絲竹曳餘音。

日和山晴望

停筇臨眺好晴景。入春和潮漲。魚龍穩。煙開島嶼多。何
時著蓑笠。此處臥滄波。斜照紅涵水。一帆天際過。

洞津宿田中暢園家次達本耕堂韻

鴛鴦渡古洞津潯。吟侶相攜趁約臨。縱興從來有紅友。
結交何必用黃金。獨行羈旅前年夢。勝宴賡酬此夜心。
醉裏渾忘更漏促。外邊霜氣盪寒深。

茶磨山莊

韓窓馬帳跡淒涼。企仰情殷歲月長。憂思難忘係家國。
江山有助作文章。隔離不斷石泉響。四壁尙留芸草香。
且向像前瞻拜罷。醇儒面目自端莊。

閒閒齋小集席上率賦似暢園

任他雪意壓欄干。笑擘黃柑興正闌。舊雨無多皆灑落。

陽春
十日
九日

新春第一此團欒夜從柝響始歸靜人與梅花偏怯寒
更約東台煙月底琴尊畫閣續清歡

結城公祠下作

天龍洋上颶風急羣蛟齊怒馮夷泣樓船掀舞如葉輕
亂濤百尺銀峰立八道戰塵起豺狼唯公夙志在勤王
獻策帝闈幸嘉納欲擁龍種靖東方七日七夜漂蕩後
無端歸到洞津口皇天降殃願空違矧復伏枕呻吟久
七十老軀何戀生終始留得寸心誠恨不清京梟逆賊
排雲再見天日明俯仰乾坤一破涕拔刀切齒溢焉逝
底事豚犬蠹家聲倒戈却恃負嶠勢獨喜仲子秉純忠

當日名望亞楠公行刺不克先殉節橫屍闕下爲鬼雄
寒煙蔓草城南路幾人此來掃古墓修祠建碑苦經營
賴有賢侯寄思慕先皇當宁恩詔宣昭代旌褒非偶然
一門英豪咸配祔俎豆祭享自年年君不見賊首乘時
逞殘虐兒孫亡國終零落豈若精靈長不泯浩浩正氣
茲磅礴湊川藤島元同儔懦夫興起良有由公也泉下
庶可瞑汗青傳名亦千秋

題正木鶴山縣歐洲再游詩稿

獨夫昨爲虐新鬼滿荒墟試問城池跡無非戰伐餘生
民洵可痛霸業竟何如一嘯秋天濶浮雲有卷舒

千里君鄉遠。延留了。夙緣。來從殘雪路。恰值晚梅天。心事輪蹄外。生涯邱壑前。何時俱載酒。游目到斜川。

畫梅引贈有賀春波。

春波耳順初畫梅。刻苦多年雙鬢摧。祇因跌宕脫凡近。硬筆一揮生面開。當其解衣而盤礴。意匠經營自沈著。興王忽潑墨淋漓。從心所欲無羈縛。徑拂縑素疑有聲。枝一丈強斜又橫。老苔被之態殊好。千朵萬朵次第生。塵外標格寒更淨。個個圈花花相映。花皆五出藥一攢。清氣純鍾天地正。玲瓏照眼玉色勻。占斷瑤臺第一春。

疏密之間丰容澹。冰雪性情恰得真。墨香宛與花香似。此時見梅不見紙。寫意功夫在毫端。技到入神可以已。翔奇直奪造化工。一洗人間膠粉空。須凌仁老墨三昧。師心獨運變無窮。年年裹糧千里去。芒鞋尋遍有梅處。往往殘夜尙遲留。翠羽一聲天欲曙。棹入西泠煙水間。疇昔鴻蹤寄孤山。幾回步繞林逋墓。足躡疏影久不還。妙悟頓教品韻雅。從此挾藝行天下。果然聲價冠一時。通刺盡是索梅者。有明巨擘王元章。孫家多才又擅場。爾後墨戲漸頽靡。漫弄口舌其說長。近時筱菴推出色。百梅圖卷足楷式。此外世上寂無聞。老手如君不易得。

一丁二體與俗諧。九變十種類。談俳何物狡。兒製畫譜。託名花光欺。等儕多君慧。性務窮本。脫却窠臼。抵深穩。一跳乃升孫王堂。誰信染指年已晚。有時佳句費尋搜。細心推敲就予謀。若能題款稱其畫。勝情千古最風流。相思半宵成奇夢。何處空山春雲凍。拍手梅邊笑逢君。仙愁一片笛三弄。萬花如雪月如煙。莫是縹緲羅浮巔。覺後枕頭看髣髴。真耶幻耶且茫然。嫩寒忽遞香脈脈。認得君家落筆跡。四壁錯作夜山欹。燈痕白於月痕白。

朱竹垞遺硯歌爲成田魯石碩內作

一片琳腴貴於璧。莫是媧皇鍊餘石。埋在南荒瘴霧中。

居然紫潤帶瑩澤。名工刻琢巧如神。斑采散色看更新。從此空坑寶氣薄。羚羊峽荒山鬼瞋。玉海金陵嫌俗態。龍尾鳳味等兒輩。隱約水暈忽描環。分明墨光疑潑黛。仔細檢畢頻撫摩。偏驚妙品終不多。兩處勒銘具姓字。康熙乙亥朱竹垞疇昔先生謝衰老。從容林下棲遲好。明年拓地荷池南。曝書之亭始營造。七十游閩興何如。初白詩翁偶同車。終焉有志憾難遂。仙掌峰前暫躊躇。北向吳門理布屨。查山二月梅花發。旋過西湖值南薰。卸笠古寺倚清樾。消夏灣頭雨晴時。譜出眾船新竹枝。後夜月明瓜州渡。大江煙水歸興宜。平居起臥蕭齋裏。

秘碧吟廬詩鈔 卷十一
五
矻矻鉛槧無停止。撰著孰不期千秋。次第稿成壽諸梓。
汝侍座右十五年。終遭先生館舍捐。其間隨處荷深眷。
毛穎陳玄共周旋。知白守黑多妙用。傳經說聖寸心共。
希繼名門儒素風。子孫收藏此耕種。獨奈坵西冷夕曛。
草生亭址路難分。笛漁有嗣傷零落。降及雲仍又無聞。
秋崖畫筆餘遠韻。萬卷遺書誰相問。但道文人靈魄存。
果然汝獨免劫運。何年超海到雞林。夫君獲此喜不禁。
直凌鷗波大雅目。十襲寧換千黃金。愛而作執亦无咎。
切囑後來慎授受。眼見人間小滄桑。秀水軼事吁嗟久。
髣髴支牀光燄生。休將名器漫論評。先賢手澤須珍重。

憑汝更增景慕情。

同僚友游淺川驛

春山靜似睡。朶朶相聯屬。春水淨于染。彎彎又紆曲。欣
欣樹向榮。雨後生意足。的的疏花明。韶光妍不縟。晴日
浮郊坰。遠近迷游囑。林陰拖午嵐。人禽影同綠。披襟縱
幽賞。俯仰隨所觸。矧有素心人。勾留薦芳醪。回首長安
市。名場有榮辱。只願拋塵緣。此來園自鬪。

銚港江月樓題壁

撼地江聲雜海聲。東方漕運久聞名。中流舫響隨潮遠。
半夜燈痕隔岸明。終古難逢青眼客。有時要續白鷗盟。

醉餘嘯倚欄干角。不管魚龍變化生。

四月初一至水戶。游偕樂園。梅花既落。悵然賦此。姑射神人白玉鄉。絕憐素豔易凋傷。天寒孤店酒無力。花落一園苔有香。曾歷霜矜獨韻。寧隨桃李鬪新妝。風前短笛誰吹破。聽到黃昏恨更長。

水戶懷古

雄藩遺蹟幾回經。春到舊園筇可停。門廡草深弘道館。笙歌日永好文亭。清流自古嗟牢落。信史居然存典型。瞻拜崗頭祠廟儼。千秋義烈德惟馨。

西山

梅洲堂

亂山周遭在。迢迢荒驛西。巖壑鍾秀氣。靜幽入無倪。桃源野橋古。峽間路高低。邈與世相絕。宛似武陵谿。義公卜菟裘。耳順此寄栖。耕種伍村叟。隴畝把鋤犁。想當閒暇日。獨行乃扶藜。心字池可鑑。觀月邱可躋。歸來酒方熟。醉餘試品題。夜深又剔燭。史稿子細稽。高風足千古。不愧慕夷齊。一夕騎箕尾。衆庶皆悲啼。希賢仍起予。緬焉有餘悽。遺構逸躅存。勝緣無阻睽。東風吹衣暖。雨後春滿畦。垂柳綠煙裊。晚梅落成泥。晴日生微靄。遠近郊樹迷。夷猶停步久。隔塢聽午雞。

義公墓

既憑瓜葛親。併居方伯尊。治國三十載。樵牧猶記恩。開
局延碩學。纂述卷軸繁。堂堂大史筆。輯成一家言。王霸
明名分。心事誰共論。曾修楠子墓。期使薄夫敦。晚節隱
幽僻。煙樹環孤村。好采西山薇。笑開北海樽。何年建壽
藏。巨碑倚巖根。作文審終始。五柳風骨存。雖時有隆替。
十世推雄藩。豪俊頻輩出。維新茲發源。驛市數里外。崗
勢如馬奔。龜趺儼不缺。佳城石爲門。風水自然宜。松楸
白雲屯。月前栖仙鶴。霜後號峽猿。衣冠歸黃土。冥漠隔
九原。迴風苦于咽。野花啼有痕。潛闔閉長夜。怒焉賦招
魂。河嶽倍靈異。清氣滿乾坤。

朱舜水墓

崇禎國難起。板蕩悲明季。公亦頻苦辛。惜哉時不利。當
初矜高踏。徒爾徵書至。弘光遭論劾。舟山暫潛避。後感
魯王知。青冥欲奮翅。九州旣瓦解。江山剩痛淚。交趾停
舟再。瓊浦寄蹤四。東來不復還。聊做魯連義。旅食貧難
支。斯才嘆廢棄。賴有賢侯迎。乃就賓師位。諤諤同周舍。
進說無猜忌。魚水契何深。可以敦風誼。夙識鄭大木。尺
書遠相寄。安得借援兵。轅門笑竝轡。痿者不忘起。回天
心無貳。撫枕聲暗吞。黃泉空齋志。前輩王文成。共生餘
姚地。依然看典型。獨嗟時世異。峻節固軼群。身後獲美

私碧吟廬詩金 卷一
諡底事豎儒狂。反脣漫譏刺。侯家分墓田。制度無不備。
大署明徵君。何復要碑誌。瑞龍山徑深。松柏蔚然翠。如
聞秦廷哭。終古咽清吹。

下那珂川

隔岸茅亭颭酒旗。幾株新柳影低垂。天然粉本須看取。
平遠江山是郭熙。
艣聲如雁一舟還。蟹舍魚莊八九灣。只有澹煙宜渲染。
江南江北幾重山。
掀篷宛作畫中看。垂柳絲絲雨未乾。忽地收罾漁艇散。
一江煙水漾春寒。

扁舟偏怯打頭風。江路南開潮水通。汀柳岸花有生意。
鶉鳩啼破雨濛濛。
腥煙搖曳海門橋。漠漠天陰帆影遙。細雨峭寒沙路黑。
魚龍得氣捲春潮。

大洗海樓醉中放歌。用黃仲則觀潮行韻。

浩浩懷山又襄陵。江河一漲亂濤興。矧乃積水所漾盪。
銀峰湧起雪崩騰。蓬萊路遠誰能屆。大瀛遍環九州隘。
舉頭閭闔遙慨生。神往縹緲煙霧外。其初黑風忽怒號。
長鯨跋浪海動搖。馮夷擊鼓天吳舞。蛟宮翻倒蜃氣消。
潮陣急從浦口入。三千連弩力不及。欹岸側島擊可摧。

飛沫橫吹一天溼。假令颺母怖殺儂。欲浮樓船載仙童。
有時潮頭碎而退。丈大巉巖銳於鋒。畢竟化工逞遊戲。
魚龍驚起陽烏避。天下壯觀莫與儔。隔斷長安名利地。
歌闕欄前呼酒時。真個快意誰得知。渺渺連空十萬頃。
胸宇濶然實過之。

哭五弟正夫

棠棣花已落。紫荆樹亦摧。傾盡萬斛淚。慟哭向夜臺。諸
孤汝最少。賦性非駑駘。平生慣困約。窮餓陶異才。白屋
挑燈挑燈讀簡編。莫留埃。上庠名聲重。端爲冠倫魁。專心務
涉覽。東西兼研該。高論堪驚世。學博同嬰孩。誓欲趁先

哲。年壯志氣恢。業成游西洛。謀食歲月催。閒居事撰述。
屬稿身邊堆。至其壽梓者。往往看新裁。讀書與顧曲。妙
解人共推。更矜詞筆雋。字字皆瓊瑰。有時試登躋。杖屐
凌崔嵬。神王藐寥廓。長嘯聲如雷。素尚誰相比。却被二
豎猜。去秋俄示疾。菊香空浸杯。千里予偶至。倚牀枉歡
哈。顧此爲永訣。驀忽前夢回。扁鵲偏束手。伯牛寧免災。
始知病肺劇。高枕頭懶擡。春後紅變綠。久雨長砌苔。易
簣尤從容。一去歸元胎。喪車何處住。天昏北邙隈。荼毘
煙消處。淒涼剩寒灰。寡妻慰藉難。雙淚流滿腮。我亦亡
同氣。銜悲獨低徊。明日護骨還。悽然仍著衰。只愁問安

後慈母添新哀。再會期來世。方寸慘不開。玉樓雲漠漠。
旅魂安在哉。

琵琶湖上作

極浦微風度。新晴草樹妍。孤帆白如鷺。遠水碧於天。欲
攬湖山勝。暫忘塵土緣。前游人不在。俯仰一悽然。

次韻答徐仲可見寄

何時尊酒細論文。相值無因夢見君。南雁却飛俄有信。
夜來愁緒亂于雲。
十年瘦損沈休文。海外知音最憶君。欲往從之煙水濶。
夢魂容易度吳雲。

可無劍氣動星文。百世憂深獨有君。整頓乾坤果何日。
白衣蒼狗變浮雲。

八月初一。六甲山苦樂園訪福田眉仙。

與君昔尋昇仙峽。濟勝未嗟脚力乏。四山楓錦落照妍。
林下夷猶猿鳥狎。與君次訪蓼城墟。滿目滄桑暫躊躇。
故濠欲波西風急。芙蓉紅褪墜粉餘。無聲詩與有聲畫。
何須區區爭限界。隻手直奪造化工。擲毫大笑共呼快。
敢道夙約易阻睽。重理行李好提攜。起指山陽川原壯。
迢迢一路黃薇西。前度鴻蹤低徊久。茲游奇絕足相偶。
忽忽上車便趁程。應是午夜酒醒後。羈旅之苦吾未知。

笠屐逍遙隨處宜。最喜一身無檢束。絕似飛鳥任所之。

望岡山城。弔浮田秀家。

石山宜連壁。旭河堪作濠。雉堞煙消處。譙樓百尺高。烏城屹當西州路。龍盤虎踞金湯固。誰專城居擁大封。可憐公子是紈袴。關原一敗志難成。南島炎瘴寄餘生。當時城中皆鼠竄。焉得歸來此爭衡。劫後山河三百歲。金吾懦豎今安在。吁嗟乎慷慨赴義猶男兒。故國神游魂不餒。

高松城址

足守河漲急于潮。濁浪山立盪麗譙。自古水可亡人國。

猴郎豪氣衝九霄。昨請主公來督戰。底事遽傳京洛變。城陷且喜我武揚。三家使至笑相見。絕代霸才善乘機。舉鞭東向疾如飛。乃臬豎子朝天闕。從是海內服英威。城墟今有炊煙上。幾處桑柘秋色爽。環之營壘跡可尋。蛙鼻崗頭草木長。君不見修理左近皆人豪。銜命東陞擁旌旄。報仇之義却如忘。輸著此公聲譽高。

豪谿

通幽一徑往如還。信步好尋泉石寰。竦峙猶爭高下勢。幾多青峭四圍山。

雨後林巒爽氣饒。路從澗畔入峒窈。我來試作蘇門嘯。

峭壁攢峰乍動搖。

石徑高低林下分。誰家水碓隔谿聞。亂峰齊著晴暉色。
一抹青霞襯紫雲。

何來秋氣捲松濤。快意都忘跋涉勞。行到谿迴峰轉處。
巍然一柱插天高。

撥雲飛步躡天梯。老樹荒巖罨畫谿。愛個茅亭殊敞豁。
俯看脚底鳥飛低。

幽僻由來秀氣鍾。雲嵐匝匝護仙蹤。怪奇百出無重複。
看自圭峰到劍峰。

峽樹重重谿水奔。數家雞犬別乾坤。倚天千仞蒼崖底。

洞口雲深石作門。

巖花欲碎露猶滋。陰壑生風午日遲。橫嶺側峰頻變化。
迴瞻橋上立多時。

蘿磴松崖嵐翠凝。清秋絕頂曲欄凭。招提已歷恆河劫。
無復雲巖入定僧。

物外游蹤猿鶴盟。高人軼事耳頻傾。鬼神呵護磨崖字。
莫遣魯公矜盛名。

絕幽鑿險苦相尋。終古風煙洞壑深。貌得大癡真面目。
江湖名播紀春琴。

勝賞谿山約不違。行吟半日足忘機。向人且詫詩囊重。

貯得煙嵐幾片歸。

歸憩滴翠樓。酒間賦似津下蘆舟。

智章

遠客臨荒路。低徊始欲愁。停車逢好友。聯屐作同游。羣嶂排雲出。亂泉衝石流。谿頭茅店在。沽酒且稽留。

後樂園偶得

絕勝名園天下聞。嬉游士女每成羣。涼生池面城陰直。秋拂林梢塔勢分。晴日浮庭異禽集。微風度徑雜花薰。緬懷芳烈此經始。金谷玉津何足云。

帝釋

地僻村墟小。炊煙木末生。谿聲分遠近。山色變陰晴。神

鬼虛堂邃。丹青畫壁明。幽尋終不飽。更向石梁行。

白雲洞

蒼崖路盡處。洞口生白雲。驀地風鼓盪。日色慘欲曛。隨手雲可擘。襟袖皆氤氳。我願遐舉去。笑伴雲中君。

鬼橋

帝釋之水頻奔駛。流下急灘疾於矢。衝波逆折巨靈暝。穿破石壁終靡已。異哉其跡類斜梁。谿澗大壑此中央。連延不斷穹窿勢。蟠竦懸空千尺長。茲來諦觀窮殊狀。欲就橋上試高唱。挽蘿捫葛獨躋攀。足躡瓊瑤神方王。橫槎覆版豈同科。一路坦夷牛馬過。須比欄楯迭承翼。

兩邊列植喬樹多。日色微暈秋氣爽。脚底飛湍似雷響。
峭風吹落溼嵐重。濛濛水霧相摩盪。天台石梁久擅名。
方輿鬼橋一夜成。曾由畫圖看髣髴。焉得東西競輸贏。
淑靈磅礴闢奇勝。果然名實恰相稱。不辭長途歷險艱。
游陟多時縱清興。真個洪鈞能起予。俯仰幾回瞠目餘。
描寫誰矜筆力壯。前有杏坪後朗廬。君不聞二尊當日
奉天敕。行度浮橋暫止息。瓊矛直探滄溟深。鋒滴所凝
卽成國。又不聞祖龍暮年海上游。欲觀日出意未休。何
者造橋爲驅石。鞭之東首奈血流。我與風塵絕拘繫。恍
然魂馳鴻荒世。却笑海神竟無功。莫是媚人事暴戾。停

筇浩歌氣更雄。咫尺碧霄路可通。安得羅家道士攜手
去。移步銀橋到月宮。

長門峽紀勝六首。

峽口屹石門。蒼煙自包孕。洞壑窅以深。峰嶂莽綿互。丁
字二流會。上下灘聲應。潭間漾龍氣。終古頑陰暝。登頓
穿犖确。客與雲爭徑。棧閣相鉤連。引人漸入勝。巖花散
有香。遠風涼不定。曉禽哢好音。瑣碎亦可聽。清境延佇
宜。孤賞意頗稱。寧厭跋涉勞。谿山堪縱興。

石筍兀當前。拔出青冥上。雄奇偏作勢。離立絕依傍。面
面鐵光明。爽氣此醞釀。初日爛射之。縷縷紫煙颺。餘脈

長蜿蜒。鬪險不相讓。巨靈所鑿刻。一一窮殊相。路盡沙
岸頭。滌洄奔流漲。清樾早生秋。虛籟亦搖漾。步步觸目
佳。濟勝更前向。偉哉活畫圖。荆關輸奇荆。

仄徑躡屐行。捫蘿偏艱苦。紆曲緣危崖。險夷無定所。亂
峰碧四圍。缺處茅亭補。須臾谿煙歛。好景快先睹。秋水
徹底清。臨流首自俯。纖鱗若空游。個個堪細數。其上魚
路斷。湍勢疑發弩。夾岸嘉樹繁。時著異禽語。襟懷殊暢
適。賴有賞心侶。賈勇更趁程。戴笠日卓午。

四山迴合處。竹樹蔚作林。林杪被風搖。繼之一蟬吟。步
度橋獨木。行行樵路深。雲氣不離石。澗畔生微陰。泉源

頻幽咽。韻於笙匏音。竭來祛歎蒸。涼吹颯入襟。畫僧昔
所宅。高隱跡可尋。游藝遺塵世。何管歲月侵。眷言殷仰
慕。邱壑無古今。我亦鑿止水。始悟清淨心。

晚尋金鄉谿。萬巖瘦如削。斜日山氣深。紫翠紛交錯。隨
步趣有加。履險輒驚愕。崖腹洞門邃。分明鬼工鑿。脚底
雷霆轟。水石怒相搏。羣流趨就下。洪波漲澗壑。當其峽
勢窮。巨瀑自天落。風挾濃霧吹。飛沫濺林薄。雖無豺虎
虞。言歸移芒屨。餘輝樹罅明。荒塗辨約略。

峽天易昏黃。巖頂逗返景。彩翠猶照爛。飛霞一抹永。須
臾暝色深。遠近濛相併。飢禽啼空谷。煙霧罩修嶺。林葉

帶風涼。夕露瑩且冷。入夜萬籟暗。泉溜破寂靜。此心涉
高曠。塵事都驅屏。何須學鍊汞。去尋葛洪井。超然觀物
理。坐久發深省。谿樓月初生。欄角秋氣警。

長門峽歌用諸家唱和韻寄高島九峰

張輔北海

得三二老

觀水每擬窮其源。峽天蹙處青倒奔。除非秀靈誰延款。
真境須與靜者論。二妙才在機雲上。桑梓地僻迴亂嶂。
會心豈啻濠濮間。試問少時幾相訪。勝情不負好山川。
闡幽快著祖生鞭。名兄詩與令弟畫。能遣佳景天下傳。
我亦平生愛游覽。杖屐遠來躡絕險。灘聲如雷崖勢危。

四面嵐光綠于染。君家賞鑒爭不得。可比紫氣張華識。
怪底蜻洲西盡頭。山重水複別成國。

疊韻寄國分青崖

詩思湧如流水源。幾人聯鑣共競奔。靈光巋然堪欽仰。
平生尊酒許同論。千瀑洞口龍潭上。知君卸笠揖青嶂。
得意拾句屐躡雲。迂路金鄉亦尋訪。今我行邁隨長川。
紀游輸君著先鞭。乃避雷同入剗刻。吟到太苦厭浪傳。
羣豎多未經勝覽。區區趁韻語寒險。僥倖附驥偷聲名。
例是因汚而成染。筆有千秋非苟得。斯道仍要高人識。
始作俑者無後乎。怕見荒蕪遍詩國。

阿武川舟中

舟從天上落。山向浦頭奔。斜日低平楚。炊煙罩一村。傍汀風不定。出峽水初渾。回首仙源遠。又聞城市喧。

山田別池田長谷

喜次韻

率賦

一汀疏柳帶秋聲。水國晴開夕照明。分手憐君歸路遠。暮雲天末指烏城。

欲游青海島終不果乃賦此

分明鼇背島煙青。絕勝居然毓秀靈。帆外有天成遠勢。磯頭無石不奇形。日烘水府蜃樓幻。潮打洞門龍氣腥。
且願他時風力便。笑招海若此揚舲。

秋吉瀧穴

洞口蛟潭黑。其下瀑流決。懸棧百尺長。緣崖巧架設。炬火導客行。相顧戒蹉跌。奔湍忽當前。沙岸路阻絕。刺舟始可渡。前程更曲折。仙蝠乘暗飛。窈窕乾坤別。鍾乳所凝成。形態皆奇譎。無復斧鑿痕。宛與神工埒。綏綏瓔珞垂。閃閃刀戟掣。旛幢輕搖颺。籩豆儼排列。石杵可撞春。金柱矜瓌傑。鱗爪龍身全。青黃虎文綴。巨房容萬人。四壁皜而潔。髣髴水晶宮。虛明光瑩徹。仄行千餘步。陰寒劇清切。悄然回踵處。泉聲竇底咽。大滌與太真。何由漫旌揭。羊門與馬戶。亦當愧淺劣。天眷古長門。此通地肺

穴雲雨中潛藏。元氣莫漏泄。

橋本海鶴吉兵衛宅觀賴山陽真蹟耶馬谿圖詠史

樂府二卷賦此爲謝。

君家竹下翁。翰墨獨娛老。儒雅風骨高。何人不傾倒。夙知賴子成。車笠交情好。儲藏皆真蹟。可以資研考。耶馬谿山奇。杖屨躬探討。胸中邱壑在。健毫試一掃。渲染無匠氣。巖巒訝天造。記文尤清雋。勝名播世早。樂府晚年作。李尤輸才藻。論斷勸懲宜。篇篇非枯燥。寫之首尾全。得意歸狂草。走蛇出深叢。游絲裊晴^吳。藝備尋名門。零落傷懷抱。奕世稱素封。齊家定有道。書畫滿一船。慎重

當共保。既爲希代珍。卽是天下寶。

舟入多度津。三谷象雲來。迎導予至丸龜。共宿玉

川樓。用前年唱和韻賦似。

五過讚州地。熟路固無艱。尊酒逢良友。風煙似故山。亂蟬當晚急。遠樹帶秋閒。明日宜聯轡。半天霞綺斑。

三宅素菴震介說田桂堂恆來過。酒間分韻各賦。

玉女投壺處。英雄失箸時。雷聲劈山出。雨脚挾風馳。薄夜燈初上。新涼骨自知。高樓呼酒到。勝宴可無詩。

志度寺

淨地晝無暑。移屐向上方。雛僧漫饒舌。緣起素荒唐。幽

秘碧山廬詩鈔 卷十一
宮波底杳。毒龍太猖狂。完璧歸亦晚。一死報吾郎。莊嚴
開紺宇。樓閣金碧光。鐘鼓轟晨昏。祇樹嵐翠涼。屋島青
當面。秋到舊戰場。奔潮盪斜照。海山晚蒼蒼。

平賀鳩谿故宅

驩虞無事久。文武重門閤。所以有爲人。蓬蒿吞恨歿。出
身吏胥家。天才頗英發。削籍賦遠游。素志在簪笏。夙講
物產學。究理常矻矻。巧智奪化工。精華長不竭。寧堪居
賤貧。徒爾消歲月。時屈處士尊。權門試干謁。悍馬誰駕
馭。歷塊誤顛蹶。睥睨古今盡。滿胸氣鬱勃。諷世機鋒銳。
文章亦傲兀。末路繫囹圄。空瘞千金骨。桑梓故宅存。招

夾

提賸斷碣。精神所憑依。遺蹤未湮沒。縱獲壓代名。終生
唯倉卒。大材難爲用。馨香易銷歇。

琴林公園

晴波涵孤嶼。閒鷗自浮沈。滿汀白浩浩。平沙三尺深。碧
落含顛氣。蒼靄遮遠岑。一徑導入入。鬱鬱喬松林。如蛟
龍騰擲。挈雲海山陰。如戈矛攢簇。衝天柯條森。忽值驚
風過。鼓鬣齊長吟。颼颼響不斷。靜聽韻于琴。松釵紛鋪
地。早秋涼上襟。坐憩占清境。翛然愜素心。佳人隔千里。
跂步難招尋。安得託所思。傳此瑤華音。

栗山堂

寬政三博士先生班其首。自少蘊蓄深。矧復才力厚。西
洛初遷喬。嚶嚶鳥求友。儒雅振名聲。輿望等山斗。起應
霸府辟。乃在知命後。異端可排擊。五鬼皆却走。泮宮制
度全。教人懇開誘。學風爲一新。功績長不朽。有時參幕
議。經世展抱負。言行道亦行。何必帶紫綬。培壇仰主盟。
共推射鵰手。聲律繼中晚。文章趁韓柳。故宅栗山陽。四
面帶林阜。雞犬一村幽。煙嵐通窓牖。遺像宛如生。清高
誰相偶。招魂玉樓遙。顧嗟歲月久。

鹽江浴舍題壁

峰巒環抱處。泉石別成鄉。秋簾通山氣。風簾盪午涼。微

吟心自樂。孤坐日偏長。暝色生林杪。忽聞蟬語忙。
步到野橋頭。涼天暮靄收。燈痕明在水。松籟颯成秋。猿
鶴如同宿。雲山足勝游。長安千里遠。絕境喜淹留。

土柱

三山鍾秀靈。六嶽矜窄巖。此間算卅勝。何者掌祕鑰。千
帽拔地峻。絕谷一寥廓。土筍森排比。洪鈞巧雕鑿。中央
瑞穗洲。天柱雲作脚。其餘形貌殊。兔起而鶻落。清淨密
巖土。塔勢自秀削。瀟灑神仙境。洞門看隱約。蓬萊屹當
面。日月照樓閣。滄溟遙接空。波濤趁蛟鱔。角立無雍容。
高下更紛錯。怪詭那能狀。瞠目輒驚愕。風雨所洗熨。泥

稊碧吟廬詩金 卷十一
滓難依著。團沙凝亦堅。黃土併屬絡。圓山與步頂。宛然得崖略。既是飽醇醪。誰復思糟粕。停筇縱觀久。疊足頻歡躍。林莽淒以風。蒼煙籠大壑。探盡天下奇。遠游殊不惡。一舒曠士懷。莫言賦分薄。

大步危

峽天窄於甕。蹇步傍山背。峭壁水光翻。其下一谿耳。衆流所滙合。渦旋無定止。潭沱澄碧深。宛與瑠璃比。翛然發興奇。游懷鬱以企。一舸截漣漪。顧盼棹頻弭。屹萃如豎屏。兩岸纔尺咫。挺秀勢更壯。巨巖紛竦峙。石皴自參差。斧劈殊恢詭。百獸爭向背。命名巧相擬。想像幽宮底。

萬怪聚成市。破蘚痕縱橫。蛟涎流有泚。物象頻轉變。忽過七八里。棄舟仍夷猶。獨立河之涘。矯頸望去程。曖曖午嵐紫。木末行人小。崖腹路逶邐。山水含清暉。都在畫圖裏。崇睇應接忙。歷險魄爲褫。終古元氣鍾。谷神長不死。何當緩我行。攬勝暫在此。

琴平別三谷象雲七疊韻

爲感平生誼。別離心太艱。一旬聯野屐。幾處度雲山。靜夜琴尊在。清秋林壑閒。江湖饒逸興。何管鬢華斑。

大峰紀游

嶺背一徑長。詰曲到天際。歷歷萬陂陀。高下供睥睨。林

秘碧吟廬詩金 卷十一
葉露未晞。千山繪秋霽。曉嵐仍搖曳。游目忽遮蔽。石氣溼不飛。洞谷互連綴。窅深固難量。泉聲咽復細。喬樹免斧斤。彩翠映日麗。僵者如巨蟒。舉首矯作勢。絕巔入遙矚。當初以里計。停步兀當前。鑿空瑤筍銳。蒼煙襯地橫。長風飄衣袂。棲真跡可尋。伊余有夙契。

仙壇鐸響幽。咫尺勞攀陟。羊角風一吹。高寒凜相逼。鷹峰勢欲飛。孤聳殊秀特。老松皆倒生。石壁千仞仄。溼嵐莽四圍。舊翠慘無色。雨脚蹴林疾。衆嶂入昏黑。亂岫忽放晴。碧落淨如拭。洗出青芙蓉。朵朵擎天直。畿甸山低昂。眼中不遜匿。斷霞媚晚紅。須臾斜日昃。浩然發長詠。

雲臥清奇極。諸妄都一消。下界羣動息。

藐視界三千。舒嘯乘清旦。一望鋪海遙。浩浩無畔岸。颯地大風來。積陰初渙散。雲如秋水至。滾滾下江漢。五彩何陸離。晴日忽照爛。幻出金銀臺。寶光殊璀璨。山川脈絡明。掌上堪把玩。流峙終不移。丹碧錯相半。曦輪離地高。樹杪幽禽喚。的的露珠瑩。琪花香歷亂。欲測化工奇。轉瞬物象換。俯仰趣合宜。心曠塵根斷。

地震紀異

癸亥九月一日。午震火俱。誰將龍漢劫。寇茲帝王都。大塊劇搖盪。向前所絕無。聲疑巨礮轟。勢過迅雷驅。檐瓦

朱嘯

輕於葉紛紛地上鋪。夏屋船同颺。摧塌在須臾。厚土生
拆裂。斷礎埋泥塗。世界疑破碎。神鬼爭奔趨。天色變陰
晦。青氣俄模糊。沙塵簇成霧。陽^秋看欲晡。或踞椳闌下。
如何挺其軀。或橫棟梁底。可憐被血汗。恰當午炊際。戶
戶人在廚。遁逃務全命。寧免用意麤。城中驚舞馬。業風
若吹竽。八十餘道火。驀地彌九衢。壯者荷擔起。彷徨惑
前途。老幼難自拯。戰栗仍踟蹰。連旬旱暵後。物物皆乾
枯。祝融乃逞勢。乾坤化紅爐。此時震未止。顛蹶誰相扶。
匍匐避煙燄。往往灰滿鬚。溝渠亦涸盡。沙鹵魚沫濡。三
光竝弛隳。火勢及外郭。予亦退食次。捨車步崎嶇。縱橫

過街陌。寧問行路迂。毒煙迷咫尺。餘熱煦肌膚。咳嚏苦
方極。流汗揮成珠。兩脚易疲倦。一心嗟艱虞。茅廬幸無
事。開顏值妻孥。線斷電不燭。飢鼠跳室隅。崑崗火逾熾。
霄漢似潑朱。四鄰頻喧傳。云有不逞徒。百方恣暴虐。宛
然類萑苻。終宵要防護。捕賊可剪屠。形跡或堪認。其言
概近誣。門外人絡繹。追災喘未蘇。喪家兼喪親。衣敝而
貌癯。貴賤總同等。一朝作流通。勸汝救飢餓。豈吝飯一
盂。三日火纔熄。衆情始怡愉。餘震亦漸減。故址盍歸乎。
傷哉被服廠。人如樊籠拘。相率作異物。冤骨堆荒嶠。又
傳芳原里。池心葬名姝。腥波跳拍岸。碧燐出菰蘆。死者

過十萬。焦土互十區。比諸安政變。大小復懸殊。獨喜帝
居壯。不容妄覬覦。依然瑞靄繞宮闕。麗入圖。或云世逾
季。黔黎少忠孚。昭昭鑒在上。降殃試擲揄。吾謂果如此。
蒼天一何愚。警之應有方。獨奈民無辜。堪笑蚩蚩者。雷
同漫兪兪。延爲聖明累。其罪洵可誅。賑恤希勿緩。疇昔
開內帑。興復亦多費。乃蠲今歲租。雨露恩澤渥。愛民心
不渝。宰臣若方命。天子偏拂吁。

岡山客舍。池田長谷來過。仍締作州探勝之約。
欣然逢舊侶。消遣客愁饒。秋老風霜緊。天寒星斗搖。同
游懸後約。一醉又今宵。把臂談難盡。高齋燭可挑。

栗林公園偶得

名園秋正好。澄景畫難成。半沼游魚險。一林斜照明。孤
芳無俗態。落葉帶商聲。切切爲誰苦。殘蛩莎底鳴。

擬古堂小飲

駐蹕遺蹤古。兼之野趣長。重來增感慨。往事奈淒涼。九
月秋逾潔。千枝菊有芳。天陰午寒驟。雨氣罩林崗。

重謁白峰陵。疊前年詩韻。

忍看豺虎滿康衢。骨肉無恩慘禍殊。只爲綠章堆匣底。
翻教翠輦指天隅。南州地僻寢陵古。北闕雲遙魂魄孤。
一片松嵐罩斜日。深秋絕頂獨踟蹰。

側步躋攀石磴危。幾人弔古淚痕滋。生前始亂時頻變。
身後爲魔志不移。絕海風濤鯨氣暗。一邱草木鳥聲悲。
荼毘煙白北飛處。遺恨千年何有涯。

榻來秋氣劇蕭騷。餘憤難消亂水號。獨奈夙謀因倖豎。
仍留宸藻壓詞曹。寒生大地霜華重。月上晴霄鶴唳高。
旋宿招提淒不睡。半宵松籟起驚濤。

琴平客舍賦似三谷象雲八疊韻

高閣拍肩處。敢言吟思艱。星河低挂樹。野靄杳沈山。縱
酒興初逸。剪燈談自閒。一官潦倒甚。仍著舊袍斑。

直島雜詩

薇南地盡渺煙波。直指讚州帆影過。宛轉巧排如雁齒。
海天二十七青螺。

欲向滄溟釣巨鼇。扁舟鼓楫截奔濤。紅霞一片霓旌似。
遙指仙山祠宇高。

亂餘南狩記崇皇。七百年來遺恨長。鹹雨蜚煙淒不耐。
敢言軼事半荒唐。

魚龍潛躍水生瀾。海氣橫空日易殘。一霎松濤秋更肅。
靈旗高颭晚風寒。

回望神京愁不禁。且將心事託瑤琴。當時掬盡鮫人淚。
滄海潮平夜月陰。

秋碧吟廬詩鈔 卷十一
蒼涼身後有餘冤。酌酒那邊弔帝魂。目斷南天鯨氣黑。
危礁對峙是椎門。
玲瓏樹色曉晴閒。移步頻經石磴艱。絕頂平臨雲物淨。
天邊遙認淡州山。

作州道中

峽天霜氣卜牢晴。寥廓秋高雁陣橫。灑灑寒流石爭出。
夕陽紅葉一川明。
日暮車行艱更艱。林端憐看倦禽還。殘秋不耐新寒緊。
身落千巖萬壑間。
天低平野欲斜曛。一片孤城帶暮雲。心緒怯逢搖落晚。

打頭黃葉乍紛紛

飄蓬身世度年華。最是薄游吟興賒。浮蟻小槽萸菊後。
有佳酒處卽爲家。

神庭觀瀑歌

蒼崖中裂峽天幽。倒挂銀河一道流。那智華嚴昔探勝。
誰圖絕奇在僻陬。烏城北去一百里。旭河湍激疾于矢。
健步躡險到源頭。羣峰直自眉端起。千年松櫪翠作圍。
山重水複鎖嵐霏。長風一掃積陰歛。清晨石壁挂晴暉。
潑空初疑驟雨注。落而復跳水逾怒。十丈以往似垂綃。
廿丈而下漠如霧。百折千迴勢更加。蛟龍潭底頻騰挐。

決之

秘碧吟廬詩金 卷十一
大珠小珠紛四散。髣髴天山捲雪花。飛沫亂撲林莽溼。
脚下深淵盤渦急。驀然動盪崖脚危。幽宮宛有馮夷泣。
驚雷砰訇震乾坤。餘聲直使萬壑奔。青霄總作水霜色。
脈脈高寒衣袂翻。澗道秋闌葉皆赤。危棧苔滑纔承屐。
此間認取山之幽。地靈豈屑容俗客。鐵梅畫史矜先鞭。
獨憾新詩世罕傳。闡發神異空有待。我才猶輸李謫仙。

高田硯歌謝旦星南太助惠贖

神庭之瀑高百丈。跳珠萬斛紛飄盪。星山匝匝如豎屏。
清晝猿聲出榛莽。巖骨森張倚崔嵬。團團蒼黑石作堆。
總是秀靈所磅礴。終古雲氣黓不開。跂步誰穿峽天入。

霍霍磨刀頻采拾。截取雲片歸來遲。半夜陰洞山鬼泣。
仍有良工琢削忙。勁質貞姿不尋常。一經磨瑩加潤澤。
分明圓池漾秋光。絕愛發爛紋理細。金眼銀線供點綴。
方池貯水長不乾。墨華四散無停滯。雨烟赤間趨下風。
龍尾鳳喙約略同。往時邦君頗珍惜。聲價居然冠海東。
行役恰值涼秋節。踏破畏途真險絕。始信昔賢言不誣。
谿壑中開乾坤別。東道有人試勝游。半日瀑底弄清流。
一方佳硯當記念。慇懃勸我行笥收。平生勝事軼前輩。
最嫌辭讓類煩碎。既向洪崖贈此宜。要知王慈苦相愛。
黃金白璧豈同科。幾回開裹手撫摩。更約旬日東歸後。

先寫神庭觀瀑歌

高尾觀楓

一路尋幽願不違。萬株楓柏錦成圍。晚秋時節吟行好。
霜後晴烘客子衣。依稀翠黛午晴中。宛與六朝山色同。路轉峰迴三四里。
峽天霜信晚楓紅。當面峰巒磴道紆。新晴林下鳥相呼。小橋野店尋常景。
添得紅楓始可圖。千山疊疊午煙晴。一水淙淙石瀨鳴。翠壁丹崖隨處好。
葛裙蒲履繞谿行。

隱隱鐘聲出遠林。西山爽氣淨人心。步從初地扶筇上。
紅葉青苔一徑深。

石路登登不易攀。纔窮絕頂叩禪關。放眸秋色杳無際。
朵朵青抽煙外山。

白雲紅樹巧裝秋。步步尋詩林麓幽。驀地西風吹過後。
落楓碎錦趁奔流。

潑眼丹楓秋色濃。每逢佳境便留筇。遙嵐一片青如刷。
繪出谿頭幾十峰。

山山紫翠帶秋光。日午天晴一磬涼。十里清谿行欲盡。
回巖古木擁禪房。

千巖崛起峙危巒。萬派飛奔掣急湍。疊疊煙嵐吹落地。
疏林澹日又秋殘。

和氣公墳

歸傳神救濟危亡。日域憑公帝道昌。滿眼貂蟬同婦豎。
千秋氣節挾風霜。絲綸幾賞勳猷赫。旌節兼推治化良。
依舊佳城傍楓樹。亂山高下午嵐涼。

仁和寺

淨地塵緣盡。毘耶咫尺間。白雲縈一郭。紅葉裹諸山。龕
邃磬聲絕。林寒僧語閒。賞吟留半偈。悵趁夕陽還。

等持院觀室町氏歷世木像引

咄尊氏滔天罪惡無底止。建武中興業未終。旋向南山
移劍璽。咄道義既憑暴威竊名位。王號併受朱家封。欲
以天子置何地。憫殺義政是病癡。身居軍職恣游嬉。只
解品茶以卒歲。四海鼎沸不曾知。假令義尚稱聰慧。統
袴豈有心氣銳。陣中講書亦虛譽。酒色誤身終早世。二
百年間少治平。禍到弒逆最可驚。烏鬼舞酣伏兵起。竹
枝隊走作喊聲。顧無人理偏縱慾。不異鳴梟逞慘毒。上
下征利國逾危。獨奈蒼生苦桎梏。何物壯士斫汝頭。擬
杼積憤報夙仇。三條橋頭殘月黑。想見殺氣變清秋。如
今龕房森然木偶集。儼整衣冠迭長揖。無人戟手來相

秘碧吟廬詩金 卷十一
當絕勝秦家殘魂溺中泣。

銀閣

將軍鬪奢以度年。枉與乃祖比其肩。早日曾修高倉第。
一間障子二萬錢。兵戈滿地何時已。伏屍縱橫血痕紫。
高臥洛東卜幽棲。巍然銀閣凌空起。千巖擁山碧崔嵬。
一水開池綠滌洄。攬取林泉好風致。謝公塢接臨湖臺。
由來茶事尙珍玩。磁甌鐵鼎固無算。墨蹟總自海外來。
品目長存君臺觀。幾迎龍駕此徜徉。滿園琪樹生輝光。
既知德政過宮市。土木亦似花石綱。戰鬼聲悲輦轂下。
無端宮闕化荒野。獨將餘生託風流。將軍豈非喪心者。

身後蒼涼夢乍空。一朝劫火焦天紅。書史千輛而煙颺。
梁家末路慘相同。幸是蕭寺留勝跡。晨昏猶引游賞客。
漾漾池光初日涵。濛濛山色暝煙隔。選佛場古傍松筠。
依稀金碧更傷神。鐘沈魚默長廊寂。雛僧得意饒舌頻。
畢竟儉奢判成敗。皇天在上非聾瞶。可無應報及子孫。
覆轍須爲後車戒。

至宇都宮宿待晴閣。蔡城吟社諸子來過。酒間賦似。

邂逅試轟飲。更深燈影移。瓶花寒倍韻。檐雨靜相宜。一
醉詫佳句。此情同舊知。明朝趁晴出。邱壑共探奇。

大谷紀游賦似吟社諸子

新晴人影健。且喜風雨息。迢迢幾十程。駕言向郭北。楓
柏間松檜。林煙亂如織。巖巒夾路橫。往往看秀特。伐石
頻有聲。山鬼亦惶惑。更從招提游。步到翠微側。巨窟看
化工。洵推怪詭極。禪龕中嵌入。巧構借人力。揭幔徐瞻
拜。佛像誰所刻。逞技一夜成。海公稱高德。微有苔暈霑。
居然剩顏色。何關歲月徂。餘芬猶可卽。寺後起危磴。崇
崗足登陟。混沌經鑿開。絕壑深不測。羣峰青四圍。峽天
爲閉塞。崖勢危欲崩。卉木皆倒植。誰圖幽僻境。幻出煙
霞國。妙儀與榛名。未必矜男崩。鶴駕昔臨茲。賞鑒因睿

識谿山光彩添。萬象無逃匿。朗吟飛下險。如搏凌風翼。
旋就旗亭飲。觴詠真得得。諸子亦多才。新詩吐胸臆。尊
前興正酣。悵見斜陽昃。

曩與池田長谷約。歲末再游作州。及期病瘍。旬餘
未癒。悵恨殊甚。乃賦此以寄。

琴尊違夙約。心事愧良朋。二豎漫爲祟。一游終不能。流
年添白髮。殘夜伴青燈。臥在初梅底。奇寒入硯冰。

謝有賀春波贈端谿巨硯。四疊東坡龍尾硯歌韻。
天下至寶久珍惜。鏡光擘膩貴於璧。由來公論推端谿。
不許稠桑稱美石。今春鵝湖卸橐時。借此醉墨寫新詞。

秋碧吟廬詩鈔卷十一
漚潤毫芒快哉極。朶頤早已被君知。君家畫梅清無垢。
攝取花韻爲己有。吾力振之聊苦心。投贈乃在歌成後。
憶君昨嘯南極雲。琳腴專車趁路塵。木桃瓊瑤莫相較。
爾我共是同心人。筆運翰染歸練擇。豈啻精思被中畫。
臨池要繼張伯英。纔進一境仙凡別。

除夕書懷

旅食平生發興稀。始知四十九年非。文章洛下曾驚俗。
性癖人間怕觸機。每伴琴尊忘老至。翻憐猿鶴遲吾歸。
青雲夙志依然在。何日扶搖一奮飛。

秋碧吟廬詩鈔卷十一

秋碧吟廬詩鈔卷十二

東京 久保得一 天隨

新年言志 甲子

閭闔雲霞麗。初陽啓令晨。陰寒已隨臘。吹煦自通春。客
易年光換。依然帝澤勻。與其傷慘禍。不若仰洪鈞。百事
總非舊。衆情聊一新。都畿可興復。廊廟要經綸。欲極國
家盛。只憑風俗淳。恤艱頒大詔。崇險率齊民。季世誰憂
道。微官獨慣貧。私期撰歌頌。垂老賸精神。

題北越入村氏所藏俳人一茶手稿。集司空表聖
二十四詩品中之句。

生者百歲悠悠空塵。萬象在傍。畸人乘真。語不涉難。著
手成春。遠引若至。花草精神。

題湯河遠洋晚翠居詩草

袍笏登臺省。從容退食遲。清名傳世久。劇職試才宜。既
遂青雲志。翻聯白雪辭。科頭松下踞。長嘯晚晴時。
挂冠一身穩。湘上獨披襟。渺矣江湖跡。依然葵藿心。潮
聲秋捲地。嶽色晚成陰。千首新詩在。寧輸梁甫吟。
時事非蒿目。沈吟淚自零。病餘雙鬢白。愁外一燈青。文
字疑神助。江山發性靈。遠風吹入屋。未相誦遺經。

詣大社

祈賽算三度。雨晴春正和。簫聲隔廊細。花氣匝林多。海
嶽風煙永。丹青歲月過。神威堪仰止。寰宇絕兵戈。

松江城址看花

縱興嬉春好。旗亭酒易醺。湖光蘸城潤。鶯語隔林聞。天
暖過三日。花開正七分。香塵罩斜照。羅綺簇于雲。

中海舟中

湖濬導潮入。湖尾列青螺。晚霽霞如綺。春寒水欲波。估
帆趁風疾。祠樹傍關多。曲曲傳哀怨。漁娃試榜歌。

美保曲戲翻俚歌獲小詩十二首

滄海渺無際。清晨初日開。仙嶽兀當面。天風絕頂來。

今日開錨未。依然此繫舟。酒旗歌板地。海嶠足淹留。
雙棲在何日。永夜眠難成。關頭松樹老。仍有夫婦名。
勝境一塵無。宛疑天地別。海口列危礁。浪花白於雪。
一水盈盈碧。曲渚接彎碕。大仙似仙子。春寒雪作肌。
五松今亡一。風霜歲頻移。相戒勿復伐。雙雙雄與雌。
長風片帆疾。萬里度滄溟。鯨魚跋浪處。隱隱鳥煙青。
左界來往艱。潮漲天亦晚。安得架長橋。郎行快且穩。
目斷水天杳。倚欄愁思催。海門潮勢急。晚引客船回。
越船來何早。海天蜃氣遙。若非風相送。定是佳妓招。
紅樓人若玉。笙歌樂有餘。歸家見舊婦。顏色恐不如。

磯畔燈臺高。送個歸舟客。遙指十神山。溼雲曉更白。

菱浦

移船斜照裏。春漲碧彎環。魚躍波搖岸。雨晴雲補山。數
家臨水小。一鷺與人閒。曲曲汀洲邃。宛然仙所寰。
桃花經雨放。海國恰春天。積水魚龍寂。遠汀鷗鷺眠。漁
歌和舫響。潮氣雜炊煙。帆外閃餘照。落霞紅更妍。

後鳥羽天皇陵

西狩無窮恨。零丁十九年。古陵多樹色。白屋帶茶煙。京
洛浮雲外。滄波落日前。于今餘痛在。稽首一潸然。

黑木御所址

和琴山廬言金 卷十二
三
渡口眠鷗穩。低徊斜照曛。海山開別境。耕釣記遺聞。松
古荒祠小。潮平極浦分。長懷播遷日。絕島慘風雲。

燒火山祠

廟宇千年古。滄桑涕淚零。傍檐松靄翠。隔檻島煙青。大
地收羣動。絕巔降百靈。雨晴風意穩。花氣入簾馨。

西鄉港

花發紅千樹。潮涵碧一灣。人家低傍岸。日氣暖依山。勝
事風塵外。快心江海間。可憐京洛客。形役賸頽顏。

國分寺墟

淨界春無主。暮寒花落初。居然鐘梵境。曾作帝王居。文
誰固

獻兵戈後。樓臺風雨餘。殘碑不堪揭。芳草滿荒墟。

隱岐島廳觀驛鈴屯倉印引

大化之初。釐庶政。大寶以後。施新令。迢迢坦途來往頻。
冠蓋相望。威儀盛。遠使借騎。莫暫停。天家憑證。用驛鈴。
敢道千里。隔畿甸。舉鞭一過。如奔霆。四蹄蹴空。馬不蹇。
聽殘丁東聲。已遠。古關月落。雞始鳴。大野日斜。秋欲晚。
降到平安。競紛華。文物昭回。取次加。豈啻剋數。有多寡。
併因袍色。作等差。隱岐島司。笑邀客。雙手捧出。貴於璧。
形是六方。重幾觔。自然蒼黝。帶瑩澤。金縷玉文。仔細看。
銅花欲暈。碧未乾。兩邊鐫字。殊磊落。髣髴貞觀。太政官。

秋碧吟廬詩鈔 卷十二
曾經光格乙夜覽。旋賜朱櫃儼封憾。靈異寧屑受穢汗。
乃遣鼠賊驚破膽。屯倉之印居其先。唯惜漫剗稍不全。
依稀唐隸存體勢。鑄造定在養老年。當初諸州各藏一。
歲月互久都廢失。幸是絕島少兵戈。于今留得貞固質。
郡國制弛王室衰。將門興替似奕棋。一自先朝復純古。
金甌無缺壯帝基。吁嗟家國破亡易。誰擬天日長不墜。
商彝周鼎歷劫餘。摩挲懷往豈無淚。微物洵推希世珍。
到底呵護憑鬼神。陵遷谷變何所管。寶光燁燁輝千春。

名和公祠下作

天子託臣以大事。手梟逆豎本容易。子弟擐甲皆驩呼。

便知家風洵好義。昨夜白龍魚服還。帳殿構在船上山。
草木皆兵兵氣壯。勤王諸將擁仙班。莫教賊騎恣猖獗。
憑高指麾仗節鉞。若非雄帥制西陲。爭得翠華歸舊闕。
漫道偃武足昇平。傀儡場中黨禍成。嗟公功賞不相副。
仍賜御筆誌殊榮。前狼後虎急招禍。無奈羽檄來關左。
乘勢長驅鯨可屠。移時徒爾蛾赴火。輿論豈敢嘲死遲。
九衢煙塵此橫屍。太息北風吹且暴。三木一草更存誰。
卽今爽塏峙祠廟。萬櫻紅發初日照。地多焦粒知故墟。
海山形勝宜臨眺。亂峰駢立朶朶青。土花碧帶戰血腥。
想見重溟夜潮咽。絕巔月黑聚精靈。

登叡嶽六首

金碧樓臺磴勢分。了知上刹絕塵氛。高天鶴鶴寒無影。
古洞蛟龍噓作雲。陰霽湖山當檻見。晨昏鐘鼓隔林聞。
仰瞻兜率低徊久。萬木蒼蒼日易曛。
旛幢飄處翠重重。幾個高僧此寄蹤。嵐氣晴開半山寺。
樹聲遙答六時鐘。祇園歷歷丙丁劫。覺路茫茫南北宗。
應是曼陀花雨後。寶壇日暮異香濃。
空王臺殿鬱岿崿。獨躡鉤梯上絳霄。劍璽幾回辭北闕。
風雲當日護南朝。幾重煙樹環都合。百里江流入海遙。
佛火淒涼化城寂。茫茫歲月恨難銷。

巍然一柱抵天台。絕頂振衣呼快哉。三越雲山皆北走。
五畿川陸向南開。于今流恨餘湖水。到底放懷歸酒杯。
只合文章動星象。登高能賦是仙才。
勝游物外萬緣空。閒叩禪扉謁遠公。大地煙霞飛鳥外。
諸天鐘磬夕陽中。傍菴柏樹含風翠。夾澗桃花映日紅。
好掃石苔留半偈。滌除煩障幾人同。
浮生歲月奈蹉跎。靈境唯須著意過。古佛聽經倚苔壁。
幽扉引客隔煙蘿。亂山危磴懸空直。遠岫歸雲向晚多。
徒爾浪游非我事。何時衾枕寄巖阿。

龍安寺

四山平壓水。一徑傍池賒。乳燕穿垂柳。游魚咬落花。名園已榛莽。古寺尚煙霞。回首帝陵近。松楸殘照斜。

觀都踊

隊隊紅妝舉袂輕。低鬟淺笑最多情。若非天寶風流陣。便是吳宮操女兵。開遍紅梅與白蓮。惱人風格競嬋娟。纏頭十萬何須惜。轉踏分行絕可憐。粉墨登場個個嬌。靈芳國裏記魂銷。新翻一曲傳頭在。側步迴身鬪細腰。傍欄側視又橫看。細膩風光欲寫難。一瞥驚鴻翩照影。

依人弱骨故珊瑚。

絕憐趙瘦與楊肥。長比西施短宓妃。拍數參差似梭擲。連連織得九張機。

投步而趨按節歌。花飛釧動果如何。婆羅門舞龜茲樂。輸與雛鬟嬌態多。

飄飄袖翠燭華紅。今古低徊孰得同。十六天魔妝正罷。一齊舞上百花宮。

歌聲宛轉動梁塵。絃索輕彈曲曲新。看到傾鬟振袖處。欄前我亦斷腸人。

無端歇拍暫徘徊。曲欲終時恨乍催。燭影分明釵影閃。

依人弱骨故珊瑚

蛾眉螭首一時廻。
翡翠屏圍繡幕垂。燈華欲暈漏聲移。傷心巫峽行雲杳。
撥盡幺絃放隊時。

櫻井驛址

天下安危一戰分。事已到此復何云。汝若成人繼微志。
有死無他以報君。垂髫之兒甫十一。多時肅聽伏歛膝。
幾請相從泣吞聲。公麾而去呼叱叱。賊氛蔽天天日低。
海陸相竝來自西。馬革裹屍得其所。武庫山川入鼓鞮。
小楠不負名父子。可惜一摧不復起。正氣乾坤手同扶。
全家忠孝罕其比。于今洛南驛址存。千章嘉木賁一園。

巨碑峙立足不朽。幾人此留涕淚痕。桃花紅落澱江漲。
綠蕪河內野平曠。儼然儀表堪仰瞻。金剛山色青無恙。
同蔡城吟社諸子。烏森看花。

花謝水流春色移。重新綠雨餘滋。六朝裙屐去無跡。
一任午風飄酒旗。

風風雨雨送春歸。紅紫凋殘一夢非。看到銷魂更憐惜。
殘花故故趁人飛。

綠陰陰底住流鶯。幾片殘紅點地輕。何事與人偏齟齬。
天從花後作牢晴。

尋芳今日竟無緣。綠慘紅愁雨後天。相顧偷羞雙鬢白。

輸他春色有明年。

芳事闌珊昨夢尋。風吹雨打足傷心。行行屐齒著無處。
滿地落紅三寸深。

過乃木將軍石林舊居

將軍昔解綬。開荒栖白屋。日與野老親。寧屑修邊幅。晨
興赴西疇。力作伍僮僕。暮歸踏蛙聲。村徑趁黃犢。粳稻
秋上場。時有新醅熟。泥飲樂不窮。笑餐籬下菊。蕭齋寂
無人。古書挑燈讀。沈潛尋義理。君子慎其獨。大陸又兵
戈。徵起征行速。二兒冒陣斃。虜帥忽敗衄。凱旋功何偉。
胄子都倚伏。伏劍乃殉君。四海皆痛哭。舊居依然在。門

庭傍林麓。崇祠正鄰近。殿宇自清穆。魚鳥與人馴。環舍
皆卉木。境邃無點塵。好景怡心目。高節本殊倫。終古留
餘馥。生死共有為。寤寐共思服。拜跪茲陳詞。愴然淚盈
掬。精魂所憑依。遺躅莫相瀆。

佐原訪伊能東河故宅

先生藏才美。出身自蒿蓬。餘子繼他家。家道日以豐。歲
歉頻賑卹。歛然聲譽隆。所志遠且大。寧甘田舍翁。有兒
足幹蠱。長大過成童。讓產一身穩。如鶴脫樊籠。五十從
良師。夙疑初一空。其性妙推步。曆法已旁通。極星幾測
度。隨處高不同。推之算遠近。地域非難窮。一朝受幕命。

征行遍西東。蠻荒多瘴癘。沐雨兼櫛風。廿年偏苦辛。大業克始終。圖成亦凋謝。賸此希世功。北總尋故址。家在鄜肆中。諸孫守舊業。濃翠環房櫺。著述堪考據。機器皆新工。苟非思慮密。安得氣象雄。良金寫其狀。追褒禮亦崇。若人足不朽。歲月徒怱怱。

香取祠

丹青繪祠宇。林巒鬱崢嶸。關河接繡戶。日月輝彩楹。神曰經津主。儼然鎮星精。想當鴻荒世。銜命東面征。日高見之國。豺狼所橫行。一劍誰相當。取次披榛荆。旣梟賊頭盡。窮荒歸蕩平。蝦夷遠逃竄。終世勞經營。英靈眷茲

邦。凜烈死猶生。威棱覃率土。恩德安羣氓。五峰翠攢簇。參天松柏榮。龜邱中特立。闕宮高以擎。川原四無際。膏沃宜農耕。北望江波綠。一道刀水橫。鹿洲遙對峙。禋祀無重輕。生前共奉敕。身後仍齊名。我來初夏節。雨餘天放晴。薰風度朱檻。午嵐颭霓旌。遺澤渾依舊。稽首致寸誠。永晝深殿靜。鳳簫時一鳴。

寒香亭遠眺

榮黃麥綠繡成堆。晴日平郊午靄開。隱見川光細於綫。人家粉壁是潮來。

八月將游滿洲臨發題壁五首。

滄溟波穩送行舟。橐筆初成大陸游。星列尾箕天左轉。
地分遼瀋水南流。金州城郭今非昔。玉斧關河春復秋。
要訪王師征戰跡。鄂羅雲物莽難收。

千秋殷鑒果何如。祇有滿胸愁不除。松杏山川非保障。
遼金社稷作邱墟。伺邊寇盜憂虞極。慨世文章涕淚餘。
海外行游莫倉卒。每逢陳跡便停車。

路自遼陽到瀋陽。前朝舊業亦悲傷。貔貅已盡八旗衛。
魍魎猶羣百戰場。悵見乾坤賸氛祲。忍教父老嘆滄桑。
驚風晚捲沙塵起。極北天低朔氣黃。

五國城遙何日尋。黃龍府廢足傷心。冰天雪窖衣冠盡。

虎穴鷹巢荆棘深。恰有高秋供極目。怯聞暮角和哀吟。
劫餘絕域風煙慘。終古興亡淚溼襟。

西風吹到柳條邊。遙指俄疆鐵路連。日落平原牧羊地。
秋高絕塞射鵬天。二陵草木悲前代。三省萑苻記往年。
幾見鄰邦時局變。可無論策軼羣賢。

洪陵

萬壽接天磨。餘勢仍繇互。佛巖兀在前。孤峻起懸磴。佳
城翠微半。其下斜通徑。金谷地自靈。風水兼衆勝。當宁
五十年。仁慈德彌稱。顧用千里國。將有四海聽。社稷日
以危。民力亦凋罄。貂蟬紛滿朝。何由辨忠佞。太公頤指

揮肯容馬鬣脛。妃子色可否。一任鼠窺甌。流弊之所極。
果然禍胎孕。摘姦皆李陳。濟時無寇鄧。底事在深宮。默
臥如向暝。龍牀魂夢安。昏昏終不醒。錢家昨納土。儼乎
名位定。搖搖風中旌。茲始得依凭。槿域雨露新。時清休
徵應。蒼黔乃蘇息。鼓腹多野興。瑤池天西極。未借八駿
乘。方士海上歸。懿此鈿合贈。園寢芳草平。日午林煙凝。
顥氣流太虛。洗出山川瑩。

南山雅集席上賦此索和。

主客非生面。共推詩酒仙。高歌可清夜。勝會續前年。繞
屋松風爽。當欄月色妍。唱酬足佳話。明日滿城傳。

酒間鄭葵園丙朝見贈短古一章。次韻答之。

年少讀破千家集。竊期堂奧伍而入。胸羅星宿氣吐虹。
毫端倒捲銀河立。當其狂歌碎唾壺。天地震動鬼神泣。
文彩爛斑亦自然。七襄雲錦天孫織。打破元關驚化工。
耿光截空逼帝側。吾曹愧賦女郎詩。直據胸臆真得得。
有時苦吟抵嘔心。忍教驕驩嘆拳跼。如今殊域遇賞音。
縞紵修盟且長揖。大雅扶輪定屬誰。悵絕詩國皆荊棘。
與君道同好相謀。筆路藍縷須努力。

碧蹄館

西大門外三十里。驛路斜通峽谷裏。惠陰在北礪石南。

千巖巉立山對峙。高陽墟落接碧蹄。地勢近抱昌陵低。
林木翳蒼園沮澤。川陸處處開稻畦。征韓當日多遺策。
平壤失守堪痛惜。提督狃勝頻侮吾。輕裝疾驅如卷席。
先鋒四更出城行。踰險而遇天始明。鐙鼓相望戰殊苦。
交綏未肯分輸贏。乃迎中軍據絕地。且候驕胡蔽野至。
萬銃齊發陣可崩。揮擊正憑刀槍利。六隊踊躍雙翼張。
縱橫馳突氣倍昂。鮮血忽染枯草赤。驚見積屍高似崗。
奮挺大呼追兵急。雷奔電激容易及。可憐人馬走且僵。
雨後泥淖遍原隰。坡州遙隔雲幾重。奏凱旋趁暮色濃。
斬首一萬猶徒爾。恨不生擒李如松。參議威名震四海。

六十英勇依舊在。侍從年壯勳績奇。燦然史上放光彩。
一捷能使賊膽寒。千屯入夜哭聲酸。底事乳臭居主帥。
出師海外功成難。古戰場荒易斜照。深箐宛有羣鬼嘯。
亂峰高下不知名。攝衣登臨一憑弔。三百星霜首重回。
關河秋色帶餘哀。一團黃沙隨風起。仍疑鐵騎蹴空來。

水原雜詩

幾多亭榭傍城闌。水軟山溫看更新。最憶東風三月候。
兩行垂柳引游人。
錦繡江山形勝殊。萬家花柳畫成圖。可憐宮闕頽殘後。
絕似銅駝怨洛都。

離宮無復翠華來。遺構纔存歲月催。冷日微煙秋滿地。
依稀輦道只青苔。
紛紛黨局恨無窮。廟貌丹青跡欲空。回首健陵林樹隔。
六朝山色夕陽中。
經營幾載不辭勞。八達山頭臺勢高。歌闋君王剛得意。
中天紅日映龍袍。
流峙依然地自靈。華虹門下水泠泠。訪花隨柳春應好。
亞字欄干丁字亭。
斷礎頽垣隨處橫。名都遺跡易傷情。蒼龍門內炊煙少。
練武臺邊綠草平。

粉堞逶迤屋宇重。青山環郭午晴濃。昇平今日無豺虎。
八道關河總息烽。
樓臺繡錯畫橋西。翠杓金尊好共攜。萬柳青青煙水潤。
南隄一帶似蘇隄。
屬玉雙飛荷氣香。亂山缺處逗斜陽。杭眉亭上何人坐。
消受湖風萬斛涼。

高麗太祖顯陵

墟落煙火少。一路松嶽西。濃嵐綠襯地。林麓日易低。其上陵寢古。亂草何萋萋。守祧今屬誰。數家傍幽谿。野花候秋發。谷禽避客啼。峽天含涼氣。墜葉風淒淒。想當羅

朝末南北震鼓鞞。賊子爭僭號。三國互排擠。維玉器度
偉。敢與時運睽。人心所歸嚮。大旱望雲霓。統一業成早。
搏鴨兼操雞。茲肇邦基固。德與日月齊。八關嚴戒律。愛
民如孩提。訓要傳後昆。治化則有稽。興替雖頻變。流澤
覃坤倪。悠悠五百載。陳跡意轉迷。梓宮幾出壙。兵戈奈
餘悽。玉殿傾側久。石馬慘不嘶。滄桑嗟歷劫。英爽仍寄
栖。禋祀且莫怠。緬焉眷遺黎。

杜門洞

杜門洞邃隔紅塵。夾路野花秋色新。李愿之儔輸峻節。
陶潛以後見遺民。此來白首堪開社。好與青山長作鄰。

扶植綱常足千古。堂堂七十二忠臣。

真池洞古墳

方墓圓墳如厦屋。周一畝許傍林麓。荒隧路絕華表摧。
蒿草離離松柏禿。驚倒白光一閃明。羨門豁開霹靂鳴。
鬼妾梳煙鬼母哭。酸風捲地飛灰輕。銀海涸盡金鳧死。
玉箱亂點土花紫。依稀四壁圖繪存。當初丹青麗於綺。
規制恰屬高句驪。此間誰卜永宅宜。想得旌車送喪處。
清秋薤露歌正悲。長夜夢醒過千歲。不知秦漢閱幾世。
功業聲名共寂寥。舉目山河空帶礪。身後蒼涼貉一邱。
忍揮馬捶鞭髑髏。猶勝咫尺石礪委蕪穢。深篁月黑狐

移碧吟廬詩鈔 卷十一
兔游。

黏蟬漢碑歌

風雨潤田神德殊。五穀豐成盜賊無。平山之君衆所仰。
庶享吉利共歡愉。銘辭奇古申夙願。鳳翥龍蟠筆力健。
石高五尺廣稱之。元和二年孟夏建。光武中興務和戎。
樂浪疆域有異同。了知黏蟬儼依舊。翻惜漢廷棄嶺東。
朱蒙之裔伺其後。拓土漸屆遼水右。雖然唐初舉高麗。
安東都護胡得久。人世歷盡幾滄桑。倒塌長向土中藏。
莫怪字體多缺畫。一千八百閱星霜。疇昔偶拂塵。堪出。
賴之縣址堪證實。洌爲大同亦可徵。班史地理無漏失。

君不見鄒嶧瑯琊存者稀。岫嶠岐陽是耶非。豈若此碑
獨立嗤浩劫。扶桑日照更增輝。

鎮南浦卽目

半空滅沒蜃樓臺。海嶠秋晴夕照開。莽莽煙濤三萬里。
雄風遙自浙東來。

船橋里

礮火轟角吹急。吾軍四道亂流過。凌晨直踰砦柵入。毒
煙蔽天天日昏。纔認黃龍旗影翻。虜帥欲雪前度辱。背
水陣成萬卒屯。勝敗難分卯及午。喋血而進戰殊苦。底
事人馬稍逡巡。將軍憤怒猛於虎。牽制勁敵是大功。胡

命正在破竹中。羊角島邊旋風黑。牡丹臺頂斜照紅。吁
嗟乎百四十人死何烈。茲來憑弔肝肺熱。巨碑屹立高
柳陰。于今江聲尚嗚咽。

樂浪郡治址

樓船閩海奏凱回。羽書燕代日相催。欲自兩路擣巢穴。
漢兵奮迅捲風雷。淚水血紅波如染。王儉孤城憑天險。
轅門昨梟右渠頭。從是狼星收虐燄。武皇得意拓版圖。
就中樂浪當要樞。井邑安居六萬戶。殷富堪擬帝王都。
降到始元試廢置。乃見名郡增其地。二十五縣聲教覃。
未免邊荒動多事。一自洛陽火德衰。廟堂何暇服四夷。

獨有遼東公孫度。雜霸竊據善乘時。魏軍長驅征塞北。
潦草風雲頻變色。一擲徼外好山河。翻遣高麗茲肇國。
劫運倉皇陵谷遷。傷心五馬渡江前。緬懷循良舉偉績。
棠梨花酣四百年。郡治遺址占形勝。果然名實恰相稱。
地隔奔流對西京。高下峰巒莽聯互。數仞土壁仍四周。
唯奈巷陌化田疇。平陸接天渺無際。滿野黃雲禾黍稠。
漢魏瓦甎狀非一。微物却矜貞固質。孝文銅鍾絕代珍。
輓近亦自地中出。我來閒行遍郊坰。悽然感舊節屢停。
古塚纍纍石麟臥。松楸滿目斜照青。世_在沿革重回首。
陳跡最憐破國後。想得涼秋天宇高。半宵寶氣衝牛斗。

沙河鎮
溶溶鴨綠抱城流。身入遼東第一州。萬里風煙當馬首。
三邊節鉞屬虜頭。潮聲涼帶蒹葭響。野色晴分穉穉秋。
極目亂山皆北向。瀋陽天杏路悠悠。

鎮江山

憑高臨眺好。磴道苦躋攀。城郭圍三市。江流劈萬山。天
秋松氣王。日午磬聲閒。決此前程遠。行歌獨往還。

五龍背

谿村饒爽氣。攬勝便停車。水木清華裏。煙雲變幻餘。逢
秋吟骨健。對酒世情疏。樓上獨晞髮。一簾斜照虛。

夜過鳳凰城

看如殘畫夜山幽。颯地涼風樹已秋。吹角樓臺斜月仄。
銀河一道貫城流。

釣魚臺

山如馬脫鞵。騰驤不暫停。奔到白雲寨。陡壁矗豎屏。滿
谿石起伏。獅象巧賦形。有時灘流怒。一瀉疑建瓴。深湫
通無極。萬派此中停。餘勢仍跳盪。憂玉韻泠泠。釣魚臺
何峻。屹立當前汀。其上蘭若古。飛嵐翠撲扃。神仙所棲
止。草木亦秀靈。洞口鹿留跡。松梢鶴梳翎。勝名耳久熟。
幾回繙地經。駕言過橋頭。驀然困夢醒。四更月逾皎。天

澗涼露零。顯氣溢巖壑。清輝滌空青。魚龍皆潛匿。細河水不腥。衆籟歸一寂。潭心涵亂星。舒嘯愜素尚。騰化入九冥。安得恣游陟。茲采蘭芷馨。卅里行方盡。短埃連長亭。顧瞻煙樹罅。佛燈小似螢。

奉天

城闕依然形勝殊。前朝舊蹟是陪都。天低韃鞬千屯寂。地控烏桓一水趨。不怪風雲生絕域。翻從草昧啓雄圖。最思校獵高秋候。磧裏射鵬金僕姑。

福陵

千仞矗不騫。瑞靄繞天柱。秀靈茲盤結。險要東牟古。輝

山似龍蟠。興隆如鳳舞。渾河一彎流。奮迅疑發弩。磴道幾紆迴。午嵐罩林塢。闕宮邃而肅。儼然從繩矩。貝勒真聰睿。天資尤英武。敢言創業難。誓欲併寰宇。初以一旅起。連服五豪部。乃乘南下勢。兩關唾手取。明社旣震搖。防秋徒辛苦。洪圖啓後昆。神功仰太祖。咸同德漸衰。終棄九州土。精爽雖未泯。冥護將何補。伏臘猶享祀。俎豆禮可覩。夾路踞獅象。守門列貔虎。依然佳氣饒。緬懷且仰俯。松柏匝園寢。日月輝軒廡。

金鑾殿址

故宮寂寂長蓬蒿。仍憶當年氣象豪。既有富强凌晉楚。

秘苑吟廬詩金 卷十一 一九
可無輔佐亞蕭曹。武功文德門庭肅。翔鳳飛龍閣道高。
最是松山凱旋後。錦衣戰士醉仙桃。
無復瑞雲籠九閣。古今彈指一銷魂。圖書曾擁石渠富。
符璽且憑金匱尊。勝國衣冠經歲月。中原兵馬變乾坤。
仍餘朝暮笳聲壯。驃騎連營虎豹屯。
半壁河山王氣收。滄桑滿目易牽愁。宮門柳瘦作何態。
輦路草深經幾秋。燕雀高栖文溯閣。沙塵暗罩日華樓。
可堪郭北廻車去。更弔昭陵土一邱。

昭陵

渾河繞其左。遼水劃其右。川原北盡處。隆業拔崗阜。萬

井炊煙颺。中間開隴畝。十里周道平。驟車捲塵走。碧瓦
映丹壁。寢園閱年久。渺渺兮予懷。弔古茲酌酒。緬想太
祖業。紹述誰承後。文皇聖而神。功德足不朽。始起東征
師。漢陽當馬首。食漿載路迎。引領俟我后。邊藩齊助順。
關外更呵手。鐵騎急南下。一擊屈羣醜。松山凱唱高。薊
門無城守。亡明且有待。天時寧可負。淨域草鋪氈。喬梢
蘿垂綬。龍樓樹色深。清晨雲隨帚。勝朝事雖往。遺制猶
從厚。乃見侍衛嚴。熊羆依林藪。

薩爾濟。卽清祖以孤軍破明四路兵數十萬處。予
過撫順。近望其地。乃賦此。

清祖赫怒整六師。鐵騎長驅向南馳。誓當消釋七大恨。
天地堂子庶鑒之。貔貙幾萬分路至。凶徵在彼星頻墜。
薩爾濟山陣如雲。奇計決勝亦容易。手麾小隊躍玉驄。
終風且霾晚冥濛。連弩殪敵無虛發。屍填渾河血漲紅。
可憐全軍十亡九。遺棄甲仗高於阜。劉大刀死誰毒予。
從是遼東非明有。天生英傑靖朔邊。一舉成功非偶然。
餘烈却難庇其後。社稷運窮三百年。茫茫平蕪斜日昃。
千金寨下野煙黑。何來秋氣凜逼人。一鵲奮飛凌紫極。
哈爾賓車站有懷故伊藤春畝公。
白日無光雲蓬勃。陰風北來寒徹骨。何物韓豎漫跳梁。

短銃在拳倏三發。聲聲劈耳疑轟雷。驛頭人走起黃埃。
骸如蛻蟬血如海。一去英魂呼不回。旅櫬東歸片帆穩。
天吳拜跪魚龍偃。遺恨深於溟渤深。當奈公何鄉山遠。
久居宰輔推元勳。文彩風流又軼羣。晚任統監航槿域。
容易八道斂妖氛。可憐辱王驚無已。旋降黼座稱臣子。
慘禍宛同武元衡。終始有爲亦相似。末路壯烈泣鬼神。
從是箕尾吐燄新。噫公不死婦人手。天之寵靈在一身。

志士碑。卽沖橫川二君殉節處。

雅兒河灘聲咽。跨水千尺橋是鐵。若能摧之車不通。直
教俄軍轉輸絕。哥薩健兒旣臨關。欲制機先事太艱。微

服昨自燕都出。丈夫豈敢期生還。千里閒行尤慎重。其
奈苦鬪亡親從。九仞惜虧一簣功。懷中炸藥果何用。笳
吹晨動呼蘭城。萬馬南下霜蹄輕。礮雷頻轟震地軸。遼
東一帶捲戰聲。春寒斜日下平楚。斷鴻哀鳴求其侶。步
上刑場目不巾。從容就死無隻語。凶耗傳來鼻爲酸。長
激神州壯士肝。他日金湯唾手取。六師貔貅共桓桓。旣
以一身許家國。浩然之氣天地塞。借問替人今有誰。坤
輿變局真不測。哈爾賓市南盡頭。十丈巨碑峙高邱。傷
心金天方肅殺。西風颯入苜蓿秋。

赴吉林車中作

後漢王都作
史政而也

一川秋色午煙晴。山在遼天盡處橫。古戍西風誰飲馬。
黃沙滿目水無聲。
漠漠荒雲日色昏。深秋谷口野花繁。仍餘百二重關在。
峭壁攢峰扼土門。
大金天子亂流過。誓衆每矜神助多。混同江水深如舊。
津樹遮藏得勝陀。
白山黑水渺無邊。絕塞風雲浩劫前。眼見垣墉遺跡古。
胡天射獵憶當年。

林吉

黃龍舊府委榛荆。明代始傳船廠名。銀漢南來作天塹。

移碧吟廬詩鈔 卷十一
白山西走匝邊城。煙筒土障尙殊俗。蟹戶珠軒曾滅征。
金碧依稀玉皇廟。幾多樓閣繪秋晴。

遙望寧古塔有感吳漢槎之事

遠謫穹廬氣不降。朔風吹度黑龍江。既知玄菟爲殊域。
仍憶烏桓是舊邦。雪硯冰簾清徹底。天荆地棘苦無雙。
新詩幾卷堪千古。譜入秋笳裂石腔。

潦倒南冠幾斷魂。蛾眉謠詠奈煩冤。河水山雪寒加緊。
白草黃榆日易昏。萬里吳江歸夢杳。十年遼海一身存。
窮荒合見馬生角。夙志蹉跎誰共論。

值赦而歸願始酬。西風微外又回頭。離家況味悲多難。

垂老文章翻百憂。紫塞雲遙馬尋路。黃沙霜冷雁驚秋。
最思謫戍丁年日。憔悴長途著敝裘。

柳條邊歌

曼殊皇帝承天祐。沙場枕戈仍辛苦。昨自興京移瀋陽。
席卷全遼拓邦土。七百里程劃畿疆。深溝高隄柳成行。
西限榆塞東船廠。北屬威遠南鳳凰。迢迢大站塵隨步。
嫩綠拖煙軟風度。窮荒暖回冰始融。應是燕山鶯花暮。
虎箐蛇巢關外連。結繩而界尤所便。敢擬築城地脈絕。
却笑行舟錦纜牽。緬懷康熙省方日。一路雨晴駐仙蹕。
長條裊裊拂行牀。賞心月前吟成疾。滄桑歷劫烏兔奔。

往時規模不復存。胡笳吹罷天如蓋。極目蕭條野草繁。
我行今在狼河畔。川原杳杳人煙斷。帳殿遺址何處尋。
數株憔悴秋欲半。興亡轉瞬遣愁難。一種淒涼跡已殘。
流水寒於飲馬窟。夕陽慘似汴上看。

長春

龍沙戰血有餘腥。形勝于今地自靈。新府城開市塵紫。
舊圍場曠菜畦青。果然食貨每相聚。獨奈邊荒終不寧。
看取居民浴遺澤。循良誰繼李秋亭。

登首山

馬首山色翠。孤聳殊秀削。有樹皆矮小。無石不峯巒。古

壁白堊明。仍賸觀音閣。登陟自初地。濟勝須裹脚。盤空
徑紆迴。偏驚羊腸惡。老松偃而蟠。溼嵐團深壑。長嘯立
絕巔。秋聲衆籟作。緬焉懷既往。歷歷宛如昨。征戰記典
午。大星峰頂落。一擊收襄平。餘威振朔漠。文皇舉六師。
憑高列萬幕。白巖城守堅。熊虎恣挈攫。更想乙巳年。天
兵茲踊躍。礮火連三日。風雲從蕩薄。虜帥百計盡。鼎魚
欲安託。乃乘破竹勢。鮮卑地可略。清泉昔所稱。巖竇今
燥涸。唐碑湮晦久。荒草一蕭索。遺跡只墩臺。覆斗形兀
若。雖然經修治。世代堪臆度。置身飛鳥上。浩然藐寥廓。
邱山等培塿。江海亦杯勺。流峙形勝舊。顯氣方磅礴。夕

陽大於盤。煙生千家郭。

遼陽詠古

華表已摧城郭非。到頭浮世學仙稀。想當愁殺令威鶴。後二千年終不歸。

樓居白帽絕無倫。風格端於隱處真。世論當初顛倒甚。漫將龍尾屬高人。

駐蹕山頭決眚看。浮雲西極是長安。如何四海爲家後。多事遼天苦早寒。

殺聲一過鬼啾啾。日暮風腥鎮遠樓。不負死遼葬遼誓。孤臣殉國足千秋。

阜

旌旆連天瑞日光。當年龍駕此徜徉。如今蘿壁苔垣耳。無復新花綴女牆。

山河破碎礮如雷。戰罷空營鴉語哀。劫到蟲沙終不拯。積骸撐作黑英臺。

南望千山朶朶青。飄游身跡似浮萍。夕陽城郭麗於畫。何處當年遼海亭。

千山雜詩

深秋涼不風。高岫雲生未。轟轟萬芙蓉。一天浮爽氣。高標帶晨霞。石梁可飛步。行行山更幽。髣髴天台路。破曉度峇崑。仙人抗手招。長風颯然至。松籟韻於簫。

秘碧山廬言金 卷十一
悠然見白雲。白雲飛入袂。欲持贈何人。愁與天無際。
步從山盡頭。尋到雲起處。青山長不移。白雲自來去。
邈與世相絕。仙源豈難尋。空翠溼衣處。始知入山深。
林下長古苔。時看麋鹿跡。巖花不知名。三五黃與白。
信步入幽徑。嵐氣青作堆。軟脚偏恐險。獲詩便可迴。
日落餘霞妍。樹團秋色淨。樓閣爭高低。金碧互輝映。
朝向青山行。暮對青山宿。三日不離山。行蹤遍絕谷。

五佛頂

巨巖紛參錯。其間通細徑。探奇勞躋攀。翻嗟腳踏蹬。大
地羣喧絕。禽語韻於磬。老松密交加。嵐翠撲梯蹬。振衣

千仞上。俯見山連互。雲氣濛相併。洞壑自包孕。驚風颯
一過。衆竅忽相應。敗葉振商聲。幽花落不定。五佛立峰
頂。雕塑神自瑩。獨立藐塵界。無生足法證。萬象森在前。
遙睇意頗稱。恂恍如有得。俄然昔夢醒。艱苦今可償。喜
恣登臨興。靈境莫久淹。崦嵫日易暝。

宿無量觀

道士吹簫罷。乘風久不回。嵐霏闕谿壑。井氣幻樓臺。永
夜羣星爛。高秋一鶴哀。澄心觀衆妙。人世等浮埃。

羅漢洞

豁訝神所闢。古洞依高阜。陰霏渙然消。曦輪臨谷口。跂

秘苑四庫言金 卷十一
行不用燭。且隨導者後。一徑稍曲折。穿透后土厚。其中深而敞。當面鑿窓牖。巨室太虛明。陡壁輝雲母。誰人迎相揖。始遇驚欲走。羅漢聚成羣。算之到二九。儼如有次序。位置分左右。個個面貌殊。諦視知名某。浩嘯者指天。沈思者低首。或踞而豎錫。或坐而拱手。名匠所雕鑄。靈異誰能耦。總是慈悲相。似怪亦非醜。宛在三界表。秀氣恣翕受。六塵既擺脫。長修固无咎。幾時航彼岸。吾生迷津久。松聲清於水。一洗心上垢。

大安寺

隨處喜逢猿鳥羣。招提獨往斷聲聞。深秋一徑藤蘿合。

斜照半山樓閣分。漠漠林光暗含雨。濛濛石氣潤成雲。生公說法能留客。閒爇梅檀滿室薰。

仙人臺

著短屐兮躡崔嵬。窮絕頂兮暫徘徊。鴻濛散兮穹窿開。白日照耀兮金銀臺。衣裳單兮秋氣肅。覽千里兮縱雙目。遼天盡兮山起伏。煙樹蒼蒼兮辨川陸。喻元精兮發浩歌。谷生風兮河揚波。帝鄉杳兮雲霧多。仙不可即兮奈我凡骨何。

營口途上

野色荒荒一掌平。西風翻袂覺身輕。車窓指點遼河近。

帆自高粱禾上行。

巨流河辭

巨流河卽古之遼水也。其源有二。共自西北千里而
來。至遼源州相合。濁流奔駛。綿邈曲折。勢挾風雷。予
過營口。晚臨古渡。感觸曠懷。乃爲辭曰。

窮長途兮蹉跎。立津頭兮放歌。水滔滔兮注海。風颯颯
兮揚波。雷殷殷兮撼地。煙漠漠兮接坡。廻槳兮誰子。青
窮兮綠蓑。天何意兮此設險。分二遼兮以洪河。泥淖廣
兮三百里。唐兵來兮苦荷戈。歲月徂兮不回。鬱悵悵兮
淚滂沱。我欲濟兮思萬端。幽燕遠兮浮雲多。行無舟兮

擊無楫。奔流洄洑兮生盤渦。歸去兮歸去。莫驚蛟龍兮
莫瞋鼉鼉。

南山

陟盡南山險。襟喉形勢雄。風雲連朔北。海嶽界關東。因
說兵戈慘。長懷將士忠。秋聲淒滿耳。林杪夕陽紅。

旅順

白玉山高壓海門。緬懷鏖戰賭乾坤。樓船礮火魚龍竄。
毳幕風雲日月昏。草色于今染膏血。濤聲終古盪心魂。
表忠一塔聳霄漢。併仰先皇威德尊。

敢容小醜據金湯。超海天兵王師意氣昂。雄劍芒生千帳月。

私碧吟廬詩鈔 卷十二 三九
胡笳聲斷一城霜。若非雨露敷王化。或恐蓬蒿葬國殤。
要爲東洋收禍亂。當初宣戰自堂堂。

爾靈山

海山黯慘盪風雲。血肉紛飛勝敗分。既識豺狼了無厭。
何由玉石不同焚。淮西寇盡急移檄。河北路通頻進軍。
欲問當年攻守跡。九秋草木帶斜曛。

星浦卽目

極浦長風起。涼翻白苧衣。煙中羣嶼合。天際一帆飛。大
海浮秋色。高樓帶夕暉。沙汀聲乍鬧。兒女弄潮歸。

老虎灘

一帆秋色遠。海氣滿津亭。煙隔蓬瀛紫。天分齊魯青。斯
生同去鳥。大地亦浮萍。只合披襟坐。笑傾雙玉瓶。

滿洲雜詠

極目平蕪落照殷。一團雲木抱城閒。迢迢鐵路三千里。
終日車窓不見山。
榆塞柳邊相接連。清霜七月草如煙。一關鴉鶻斜陽裏。
遼海遙開徼外天。
絕塞傷時首屢搔。蒯緃一劍有餘豪。胡笳吹入西風急。
五夜天清北斗高。
王氣都從浩劫消。只因碑碣認前朝。黑林黃水杳無際。

大漠秋闌誰射鵰。

混同江水綠於藍。遺堞蕭條客駐驂。故國周遭山疊疊。

天低長白帶遙嵐。

秋色遼天次第催。莫教隴畝委蒿萊。俄羅斯菜高麗菊。

總自異邦移植來。

磧路北廻關勢雄。既看麟閣重邊功。完顏臺畔山無數。

要帶扶桑出日紅。

龍

黃海舟中雷雨驟至。走筆賦此。

長風吹起六鼇頭。十丈洪濤欲覆舟。赤日慘作鏽銅色。

黑雲翻墨半空流。忽驚礮礮閃紫電。誰驅雷車此酣戰。

倒挽銀河一瀉來。雨脚斜飛亂於箭。貝闕珠宮既掀翻。

腥氣四迸滄溟昏。天吳大笑老龍泣。靈胥披髮頻狂奔。

潮陣直挾銀峰兀。巨鯨羣吼爭馳突。地軸傾搖終不支。

乾坤疑向洋底沒。須臾雨歇風浪平。蜃煙消盡玉宇晴。

西窮碣石碧無際。海光盪漾夕陽明。平生好奇聊自負。

天試吾才意何厚。陰陽變化看有餘。胸中雲夢吞八九。

舵樓目斷杳茫間。薄暮漁翁鼓柁還。落霞襯水紅未褪。

黛痕濃繪三韓山。

歸家

挽鬢競問亦何妨。兩女牀前喜欲狂。頒得一盤紅鞞鞞。

秘碧吟廬詩鈔 卷十二 三〇
幾年留作嫁時妝。

諸川訪中村棘林。忱三遂留宿。賦此道謝。

斜照刀水明。路自古河右。村端認君門。門前裊垂柳。引
予上高堂。掃榻意殊厚。雞黍極歡娛。併羞一壺酒。銀燭
粲有光。秋氣透軒牖。四鄰寂無譁。披襟清談久。嚴君本
通儒。號曰杏靄叟。讀書蘊蓄深。逸才出隴畝。清時歛徵
起。恪勤稱職守。十年致仕歸。白屋躬井臼。撫松每盤桓。
峻節恰相偶。德化及遐荒。聲望如泰斗。老幹因風折。吉
人亦離垢。遺藁篋中堆。篇篇足不朽。停杯忽浩嘆。玉樓
空翹首。容易墓木拱。忽忽烏兔走。軼事堪拮據。仍在里

民口著述宜壽梓。校定許吾否。丈夫苟挺出。何必佩朱
綬。勸君善修身。莫負名門後。

鹽谿看楓。

新楓曝錦帶斜暉。無數峰巒莽四圍。聽盡聲聲韻于磬。
掠吾頭上一禽飛。

亂山高下共嵯峨。棧道紆縈躡屐過。青女裝秋霜隕早。
楓紅偏在澗陰多。

詩思迢迢歸鳥前。數峰笏立碧攬天。暮霞如綺斜陽麗。
楓柏丹黃繪一川。

雲生石徑送歸樵。滿目谿山秋色饒。捲地西風吹過處。

一林黃葉晚蕭蕭。

一崦秋闌夕照銜。暮寒脈脈透征衫。亂松振鬣風如吼。
嵐氣深藏天狗巖。

天風松吹鬧于濤。踏破畏途雙脚勞。小李將軍金碧畫。
幾層樓閣倚山高。

峽間只聽激奔湍。幾處亭臺燭影殘。山氣侵衾雲繞枕。
眠驚午夜又新寒。

倚欄何耐曉寒侵。驀地風生楓樹林。隔澗白雲流不住。
一天雨氣盪秋深。

澗道迢迢客再經。奔泉聲裏倚孤亭。須臾雨過雲初散。

放出遙山一半青。

千巖萬壑錦楓秋。杖屐尋詩不暫休。欲向山靈懸後約。
停筇峽口一回頭。

極月念八。出京口占。

窮臘拂衣去。人忙吾獨閒。唯貪詩料富。未覺客途艱。日
落煙生樹。天低雪滿山。烏城多熟友。勝會足開顏。

烏城諸子。過予旅寓。酒間分韻。

同社皆才雋。高談剪燭頻。終生幽憤淚。千里遠游身。縱
興有杯酒。當筵無主賓。詩成揮筆處。滿壁墨香新。

院莊。謁作樂祠。

上馬擊賊下馬草檄才兼文武固無敵君爲勾殘臣爲
 范蠡行宮白樹夜題詩一片丹心憑誰訴風雨颯沓天
 亦怒明朝衛士漫驚猜至尊含笑而却顧中興偉業轉
 瞬空每遭艱危勵孤忠如何舍之不擢用終生奔走恨
 無功卽今伏臘嚴禋祀英靈留住祠宇裏神苑近控東
 大門江山間氣鍾在此

津山客舍守歲

深交情味在團欒傾盡百壺更欲闌悄地苦吟如入定
 青氈白壁一燈寒

秋碧吟廬詩鈔卷十二

踐

昭和二年七月七日印刷 定價金貳圓
 昭和二年七月十日發行
 東京市外區鴨町上駒込十三番地
 著作發行所 久保得二
 東京市神田區美袋榮町二番地
 印刷所 尾藤光之介
 東京市神田區美袋榮町二番地
 印刷所 株式會社 印刷堂



刊 行 詩 集 目 錄

秋碧吟廬詩鈔	同	同	同	同	同	同	同	同	同	同	同
甲籤 三卷	乙籤 三卷	丙籤 三卷	丁籤 三卷	戊籤 三卷	讚州游草 一卷	關西游草 一卷	槿域游草 一卷	續關西游草 一卷	遼瀋游草 一卷	禹域游草 一卷	樵太游草 一卷
自癸丑至乙卯	自丙辰至戊午	自己未至辛酉	自壬戌至甲子	自乙丑至丁卯	庚申 大正九年刊	辛酉 同十年刊	壬戌 同十三年刊	癸亥 同十三年刊	甲子 同十四年刊	乙丑 同十四年刊	丙寅 同十四年刊

